

يوهيات النين منظومين

هبة سيد عبد العاطي

اليهيات النين منظومين

دار الكتاب العربي والقانوني

تصميم الغلاف: مالك موهبة

هبة سيد عبد العاطي

الجزء الأول

قالت سارة :

كلّما تحدّثني أمي عن زواج أحد الأقارب أو القريبات وعن الجهاز الكبير الذي رآته عند فرش المنزل الجديد تثور ثائرتي وأصاب بالحموضة من شدة الغيظ، فوالديّ قد أصرا على توفير نصف مرتبي من أجل ذلك الزوج الذي قد يأتي يوماً أو لا يأتي

ولكن ما دخلي أنا بكل هذا؟ إذا أرادوا أن يزوجوني فليدفعوا هم وليس أنا.. لماذا لا يسمح لي بالتصرف بالمرتب كيفما أشاء؟ أنا مثلاً أريد التوفير لشراء سيارة في خلال خمس سنوات. وكبداية أريد أموالاً لتعلم القيادة والحصول على الرخصة ، وكذلك أريد إكمال دراستي العليا

أنا أريد نصف المرتب الذي يؤخذ مني غصباً واقتداراً ثم من هذا الذي يستحق أن أحرم من نصف مرتبي بسببه. حاجة تغيط أنا لن أصرف قرشاً برغبتني على شخص لا أعرفه يدخل في حياتي فجأة متوقفاً أن أصبح خادمه المطيع "بلا جواز بلا نبيلة"

قال عمر :

تحسدني أختي لكوني رجلاً أستطيع أن أختار لنفسني وأن أقرر متى أتزوج، في حين أنها كفتاة تضطر لانتظار الفارس المنتظر وليس بيدها حيلة ولكنها لا تدري كم الأعباء الملقاة على كاهلي لكي أفكر في الزواج. بالتأكيد أحلم أن أمسك يوماً ما بيد فتاة –هي زوجتي- ونسير على الكورنيش وهي تتسلى بأكل الترمس الذي يزيد بطنها المنتفخ من الحمل انتفاخاً ولكن من أين لي بالمال الذي يجعلني أتقدم لخطبة أي فتاة؟ وكذلك فإنني لا أريد أي فتاة.. كيف أعرف أن هذه الفتاة التي سأقدم لها ستكون مريحة في صحبتها؟ فبالرغم من صغر سني

واشتياقي إلى متع الزواج المعروفة، فإني أدرك تماما أنه بعد أيام قلائل سيكون ما يهمني أكثر هو طيبة زوجتي وخفة دمها واستماعي بحديثها. فأنا أعرف أصدقاء قد تزوجوا وكانوا يتصلون بالشلة قبل مرور الأسبوع الأول على زواجهم، وذلك لأنهم قد شعروا بالملل ملل!!!.. وهم مازالوا في بداية البداية، إذاً ماذا سيفعلون بعد عام أو عامين؟

"بلا جواز بلا نيلة"

قالت سارة :

منذ أسبوع ألمحت لي أمي بأن إحدى صديقاتها لديها ابن يكبرني بثلاث سنوات، يعمل كمهندس كمبيوتر في إحدى الشركات الخاصة.. وهي تعرف أنه شاب مؤدب ووسيم وسيزورنا هو وأهله ليشربوا معنا الشاي يوم الخميس القادم

كنت أظن أنني سأثور ولن أَرْضَى بفكرة الزواج الآن. فأنا أريد أن أُنْبِي مستقبلتي، فهذا ليس فعلاً يقتصر على الرجال فقط، ولكن لا أدري ما الذي أسكتني؟ لعله الفضول لمقابلة شخص يريد الزواج بي.. لا أدري

اتصلتُ بصديقتي المقربة وأخبرتها، فضحكت ودعت لي بالتوفيق وأكدت عليّ أن أصلي صلاة الاستخارة، ففعلت بمجرد أن أنهيت مكالمتي معها.. وظللت في حالة قلق طوال الأسبوع وكنت أبكي يومياً في التليفون وأنا أحدث صديقتي وأنا أتخيل قصصاً مأساوية إذا لم يعجبني العريس وأجبرني والذي على الزواج منه، وكيف سأعيش في بؤس، وكانت صديقتي تضحك مني وتقول إنني أستبق الأحداث، وإنني "نكدية"، ولكن القلق كان يؤلم قلبي، ومر الأسبوع سريعاً. واليوم هو الخميس المنتظر.. ربنا يستر

قال عمر :

منذ شهر أخبرتني أمي عن صديقة معها في العمل عندها فتاة جميلة تصغرني بثلاثة أعوام، وهي تعمل في إحدى الشركات.. ووالدها رجل طيب ومحترم. فأخبرتها بأني لا أملك حالياً ما يعينني على مصاريف الزواج، وأن كل ما ادخرته خلال سنين عملي هو سبعة آلاف جنيه طمأننتي أمي وأخبرتني بأن والدي سيساعدني، وأن هذه هي سنة الحياة. فجدي كذلك قد ساعد أبي عندما تزوج من أمي وعاشا أولى سنوات زواجهما في إحدى الغرف ببيت جدي الواسع إلى أن وسّع الله على أبي واشترى هذه الشقة ولكني لم أكن أريد العيش في بيت والدي، وكان رد أمي أن أمامي الحل في أخذ شقة إيجار جديد. ولما كنت أشعر بالاكتئاب منذ فترة لشعوري بالعجز عن الزواج في وقت قريب، فقد استمعت لحديث أمي المتفائل ووعودها بمساعدة أبي الأسطورية. وتوكلت على الله وصليت الاستخارة. واتفقنا على مقابلة العروس في بيت أهلها يوم الخميس القادم، وكاد التوتر يقتلني، فقد خشيت أن لا تعجبني العروس، وكم سيكون الموقف وقتها محرجا عندما أرفضها بعد أن ذهبنا إلى بيتهم.. ربنا يستر

قالت سارة :

الخميس المنتظر قد حان وتوترني أصبح لا حدود له وإن كان مصحوبا بلسعة سعادة

فهي ليست سعادة بالمعنى الكامل، ولكني متحمسة للموقف واهو على رأي "نبيلة السيد": عريس يا امااي

ليس من عادتي استخدام الماكياج وفكرت لفترة أن أستخدمه هذه الليلة، ولكني تراجعته، فليرني كما أنا، وإن ماكانش عاجبه يبقى أنا خسارة فيه!! لكني قمت بعمل عدة ماسكات لبشرتي من باب رفع معنوياتي لا أكثر ولا أقل

تحدثت تليفونيا مع "أنتيمتي" وظلت تنصحنني بما أفعله عند اللقاء

المرتقب، مثل أن أدخل وعيني معلقة بالسجادة وعلى وجهي يرتسم الحياء، وأن أجلس على طرف المقعد ولا "أنجعص" مثل الأولاد مثلما أفعل دائما ، وكنت أضحك على ما تقوله وأعدها بأن أفعل العكس، فهذا العريس عليه أن يعرفني كما أنا بلا تزويق، فأنا عصبية ولا أطيق تحكيمات الرجال و.... و

كنت أتحدث مع صديقتي كل ساعة ووالدتي لم تحاول تأنيبي على كثرة استخدامي للتليفون كعادتها، حيث يبدو أنها كانت تقدر توترتي واحتياجي للمكالمات معها

وجاء وقت الغذاء ولم أستطع الأكل من شدة التوتر. للحق كنت أحاول أن أبدو طبيعية أمام الجميع وكان الموضوع لا يهمني، ولكن معدتي الخائنة فضحتني عندما أصبت بالحموضة من شدة التوتر وظللت أشرب في "سفن أب" وأشتم نفسي في سري وجاءت الساعة السابعة والنصف مساء وأصبح يفصلني عن لقاء العريس المرتقب دقائق.. ربنا يستر

قال عمر :

جاء الخميس بسرعة معتدلة نسبيا فقد كنت أترقب رؤية العروس التي أخبرتني والدتي أنني رأيتها من قبل، ولكني لم أستطع تذكرها، وكذلك كنت خائفاً..... قلقا من الموضوع كنت أتساءل هل سأرتاح إليها فور رؤيتها؟ هل هي جميلة و"رخمة"، أم تكون خفيفة الدم و... "وحشة"؟

هل يمكن أن أعجب بها ولا تعجب بي أو العكس؟

أعصابي مشدودة ولا أستطيع حتى ربط الكرافة ونحن نستعد للذهاب دخل أبي الحبيب حجرتي وربط لي الكرافة، ورأيت الدموع تلمع في عينيه فقلت له: إيه يا أبو عمر ده أنا لسه رايح أتقدم مش رايح أكتب كتاب ولا أدخل، فرد عليّ بأنه لا يصدق بأن الله قد أكرمه ومد في عمره ليرى ابنه البكري يذهب ليخطب، وأناي سأعرف شعوره يوم أن أذهب مع ابني لأخطب له

ضحكت كثيرا، فأبي يتحدث عن ابني وأنا لم أرَ العروس بعد. خفف حديثي مع أبي قليلا من توترتي حيث إنه ظل يحدثني عما يجب أن أبحث عنه في العروس، ثم دعا لي فارتاح قلبي وأكملت ارتداء البذلة نزلنا من المنزل وقمت أنا بقيادة سيارة أبي، حيث كان لا يقودها ليلا، وشغلت شريط أم كلثوم ليطرب أبي وكذلك لهدف آخر خبيث وهو أن ينشغل أبي وأمي بسماع "أغدا ألقاك" حتى لا يتحدثا معي لأنني لم أكن في حالة تسمح لي بالحديث.. ربنا يستر

جرس الباب

ترررررررررر

من داخل المنزل.. تقول سارة في سرّها

:

أنا مش عايزة أشوف عرسان

.. ودخلتُ إلى غرفتها

ومن خارج المنزل.. يقول عمر في سرّه

:

يا رب الأرض تنشق وتبلعني.. أنا إيه اللي خلاني أفكر في الجواز؟

الجزء الثاني

يدخل "عمر" مطأطئ الرأس ويسلم على حمى وحماة المستقبل و

.....

دعونا من التفاصيل ولنقفز للحظة الحاسمة مع دخول سارة

قالت سارة :

دخلت الصالون وقد تعلقت عيناى بالسجادة وحاولت استجماع شجاعتي لأبدو طبيعية إلا أنني كنت في أسوأ حالات خجلي الذى لم أعهده من قبل. لمحت لون بذلته البيج وحذائه البني، ثم قادتني أمي فسلمت على والديه ورفعت رأسي لأحبيه وأخيبييرا رأيت

أول ما لفت نظري كان عينيه وابتسامته، أو بالأحرى مشروع ابتسامته.. يبدو أنه كان غارقا في الخجل هو الآخر فلم يكن يعرف هل يبتسم أم يبدو جادا، أما عيناه..... فكانتا صافيتين! وكان نظره لا يستقر على شيء حتى أنني ظننت أنه ربما يكون أحول

وكادت الفكرة تجعلني أضحك، وفجأة احمر وجهه و... و..... وكان وسيما حتى في خجله هذا، فابتسمت وجلست ولاحظت أنه يتمتم بشيء ما، أو لعله "يبلع ريقه" فقد مد يده بعد ذلك وتناول كأس العصير ليشرب منه

قال عمر :

جلست على كرسي منفرد في الصالون، بينما احتل والداي الكنبه، وجلس والد العروس على الكرسي المجاور لجهة أبي، بينما ذهبت والدتها لغرفة داخلية ثم خرجت تتبعها سارة

.....

ورأيته جميلة

وكأنى رأيت هذا الجمال من قبل وأعرفه، وذهب عني توتري في

لحظة وانشرح قلبي لها. لا أقول إنه حب من أول نظرة، ولكن شيئاً ما جعلني أشعر أنني لن أتركها لأحد غيري. لم أستطع منع نفسي من التمتمة بـ"الحمد لله"، ونظرت إليها فظننت أنها تغالب ضحكة تكاد تخرج منها فعاد إليّ توتري لظني أنها رأت شيئاً بي يثير الضحك، إلا أنها ابتسمت وجلست فحمدت الله ثانية وتناولت كوب العصير من أمامي فقد جف ريقى

قالت سارة :

بدأ والدي يحدث عمر عن عمله وعن الشركة التي يعمل بها وظهر أن أبي يعرف أحد المهندسين بتلك الشركة، حيث كانوا زملاء دراسة وأوصى أبي عمر بأن يسلم له على صديقه القديم ويذكره بصاحبه عامر عبد المحسن وتحدث عمي مع أبي عن وضع شركات القطاع الخاص، بينما بدأت طنط في الحديث معي عن عملي وعن طبيعة دراستي ولاحظت أثناء ذلك أن عمر يسترق النظر إليّ كل دقيقة فتملكتني بجاحة غريبة ونظرت له في عينيه بينما كان ينظر إليّ، وظننت للحظة أن روحه ستخرج من فمه ، فقد فوجئ بعينيّ في عينيه فثبت وجهه وتحرك فمه وكأنه سيقول شيئاً ما إلا أنه لم يصدر أي صوت ولم ينفذه سوى أن وجه له أبي سؤالاً عن شيء ما في شركته فالتفت إليه، وشعرت أنه بالكاد استرجع روحه التي تدلى نصفها من فمه وانفجرت في ضحكة في داخلي وأحسست بأنه ظريف ولكنه خجول أكثر من اللازم

قال عمر :

حاولت أن أفتح أي موضوع مع سارة إلا أن عقلي "قفش" وانعقد لساني ووجدت أمي تفتح مواضيع عديدة مع سارة وشعرت بغبائي لعدم تذكري لأي من هذه الموضوعات أو محاولتي لالتقاط خيط الكلام من أمي. وظللت أرقبها وهي تتحدث مع أمي، نصف عقلي يتابع حديث

أبي وعمي ونصفه الآخر منشغل بسارة نفسها.. حتى إني لا أكاد أعي ما تتحدث عنه مع أمي كانت لها ضحكة جميلة كما أن بروفيل وجهها الذي أستطيع أن أراه فقط من مكاني بدا جذابا و..... فجأة رفعت عينيها نحوي وضبطتني وأنا أنظر إليها، حاولت أن أتحدث وأبدأ أي حوار معها إلا أن الكلام لم يخرج من فمي. شعرت بأن منظري مضحكا، إلا أنها عادت للكلام مع أمي وقد احمر وجهها - يبدو أنها شعرت بالخجل- ووجه إليّ والدها سؤالا ما فالتفت إليه، إلا أنني كنت أريد الحديث معها فأنا لم أت لكي أخطب عمي

قالت سارة :

يبدو أن والدته أرادت "جرّه" إلى الحديث فقالت له: دي سارة طلعت بتقرا الجرنال اللي طالع جديد وعاجبك يا عمر، بس ماجابتش العدد بتاع الأسبوع ده، ماتقول لها كان مكتوب فيه إيه فنظرت إليه وفتح فمه إلا أنه أصدر أصواتا هذه المرة وسألني عن أتابع مقالاتهم في الجريدة، فأخبرته وبدأ حديثه واكتشفت أنه متحدث جيد بل و "رغاي" أحيانا، فقد ظل يخبرني عن تفاصيل كل مقال ويعلق عليه ويسألني عن تعليقي، ثم يعيد ما قاله بطريقة أخرى ثم يتذكر شيئا آخر قرأه فيتحدث عنه، وانتهزت أنا فرصة حديثه لأستطلع به بشكل مفصل كان نحيفا ويبدو أنه متوسط الطول وهو جالس ولكن..... أعجبنى شكل يديه فقد كانتا كيدي عازف بيانو، أصابع طويلة وأظافر قصيرة، وكانت رموشه طويلة وعيناه بنيتين و..... وبدأت أثرثر معه أنا الأخرى

قال عمر :

عظفت عليّ ماما أخيرا وألقت إليّ بطرف خيط لأدخل في حديثها مع سارة. سألتني عن جريدة أقرأها وكذلك سارة، وأنها لم تقرأ العدد الأخير منها، فانتهزت الفرصة وظللت أحكي لها عن المقالات وكل شيء تذكرته، فقد كانت تلك فرصتي لأنظر لها "براحتي" كان كل شيء بها جميلا، صوتها وجلساتها ويدها الصغيرتان وعيناها

الضحكتان دائما وتعليقاتها التي أثارت ضحكي كثيرا كان حوارنا بعيدا تماما عن الرومانسية ولكن "نص العمى ولا العمى كله" على الأقل انحلت عقدة لسانينا وعيوننا

قالت سارة :

كانت الجلسة مجرد جلسة تعارف بالطبع إلا أن أبي وعمي قد انسجما تماما. وبدا على الجميع السعادة، ونظر لي عمر وهو خارج وقال لي بصوت هادئ ظل يرن في أذني: أشوفك قريب يا سارة

قال عمر :

نزلت أصفر وأغني وركبت السيارة وأنا في قمة النشوة.. سألتني أمي عن رأيي، فقال لها أبي إن عليها أن تترك لي فرصة للتفكير والاستخارة. أما أنا فلم أرد ولكني توقفت عند أول بائع جرائد وجدته ونزلت لأشتري عديدين من الجريدة التي نقرأها أنا وسارة

الجزء الثالث

قالت سارة :

تفكير... تفكير... وقلق شديديiiiiiiiiii

دخلت غرفتي بعد ذهاب عمر وأهله وغيرت ثيابي وخبأت نفسي تحت الأغطية حتى لا تأتي أمي وتساألني عن رأيي لا أنكر أن شيئاً ما تحرك في قلبي، بل إن صوته المنخفض وهو يقول: أشوفك قريب يا سارة قد دغدغ أحاسيسي أريد أن أقول إنه يعجبني وإني موافقة ولكن ما أدراني برأيه هو؟ وكذلك ما أدراني بأن مشاعري هذه ليست لحظية؟ ربما عمر هذا ليس جيداً كما يبدو.. إنه ليس طويلاً كما كنت أرغب.. صحيح أنه أطول مني ولكن

....

هل يمكنني أن أقضي باقي عمري مع "عمر"؟ هل هو المقدر لي أم لا؟

يا رب ارحمني من الصداع.. غدا أصلي صلاة استخارة مرة أخرى، وربنا يقدم ما فيه الخير

قال عمر :

نمت مباشرة بعد عودتي من عند بيت سارة، فكرت في صوت ضحكتها قبل نومي مباشرة إلا أن التوتر الذي أصابني طوال اليوم جعلني مرهقا ونمت فوراً في اليوم التالي استيقظت وصليت الفجر والاستخارة ونمت ساعة قبل الذهاب إلى عملي.. لم أرَ مناما أو أي شيء وإن كنت لا أعتقد في موضوع المنام، ما يهم أنني أشعر بارتياح عام للموضوع.. في العمل تذكرت أنني لم أحصل على رقم تليفون سارة، أردت محادثتها.. سأخذ رقمها من أمي ولكن هل يصح أن أتصل بها ونحن حتى لم نقرأ الفاتحة

بعد؟ سأحدث مع أمي في هذا الموضوع عند رجوعي للمنزل
أثناء فترة الراحة تذكرت أنني بقراري الزواج من سارة أحكم على
نفسي بالعيش معها للأبد

إنها جميلة ويبدو أنها طيبة، ولكن هل يمكن أن يكون بها عيوب خفية
لا أستطيع تحملها؟ كنت سأجعل أبي يتصل اليوم بأهلها لتحديد موعد
قراءة الفاتحة ولكني أحتاج أن أعرفها أكثر، ربما تكون بخيلة أو...
سليطة اللسان... لا.. لا يبدو أنها قد تنطق يوما بكلمة سيئة
أصابني الصداع من كثرة التفكير وشعرت بأن أذني قد سخنتا بشدة..
يارب اهْدني

قالت سارة :

يبدو أن هذا الموضوع سيجعلني أستهلك كميات كبيرة من ال"سفن
أب"، فالحموضة لا تريد أن تذهب.. أفكر طوال الوقت في الموضوع
هل أقبل؟
هل أرفض؟

ولماذا أرفض؟ هل سيقبلني عمر؟؟ أم؟

قد يكون به عيوب شديدة القبح وهو يخفيها بهذا المظهر الجميل..ربما
يكون من الذين يضربون النساء، ولكن لا... يبدو أنه محترم، ووالده
كذلك رجل محترم وخلق.. لا يمكن أن يكون كذلك.. هل يمكن أن
يكون "بصباص" ولكنه خجول؟ ربما يمثل؟

أأأأأأه الحموضة هتفتلني.. مش عارفة أقول إيه لماما لما تسألني عن
رأيي

خايفة أوافق وبعدين عمر مايردش بيبقى شكلي وحش وكمان خايفه
أوافق وبعدين عمر يطلع شخص سيئ.. إن أهلي متحمسون له وبهذا إذا
ظهر أنه شرير سأقول لهم إنهم هم الذين وافقوا عليه من البداية
يا ترى عمر وأهله هيتكلموا إمتي؟

قال عمر :

وصلت البيت وأنا منهك ولم تكن لدي شهية للطعام فذهبت للنوم
استيقظت بعد المغرب فصليت وجلست مع والدي في الصلاة.. أخفض
أبي صوت قناة الجزيرة التي لا يتابع غيرها هي وقناة العربية
للأخبار.. التفت لي وسألني عن حالي فحمدت الله، ودار بيننا هذا
الحوار

بابا: نويت على إيه إن شاء الله؟

أنا: مش عارف، كنت متحمس بس دلوقتي قلقان

بابا: طبعي جدا.. إنت مش استخرت؟

أنا: مرتين

بابا: وحاسس بإيه؟

أنا: مش عارف

ضحك أبي وقال: عادي برضه.. أنا ساعة ما اتقدمت لأمك عقلي شتّ
من التفكير

تدخلت أمي: ماتصدق هوش ده حفي عشان أنا أوافق

أكد أبي كلامها ضاحكا وقال: شوف يابني البنت كويسة وأهلها طيبين
وإن كنت خايف من حاجات ممكن تظهر في المستقبل، فإنت استخرت
وإذا كان الموضوع خير هيمشي وإن ماكانش الأمور هتخلص
لوحدها.. شوف إنت مبدئيا حاسس بإيه تجاهها؟

أنا: هي عاجباني وأنا مرتاح لها بس

بابا: من غير بس، شعورك المبدئي كويس، احنا نقرا الفاتحة مع الناس
وبعدها تشوفها وتتكلم معاها عند أهلها كام مرة، ولو زاد ارتياحك ليها
نكمل ونعمل الخطوبة اللي برضه هتكون فترة اختبار بينكم، وإن
ماحصلش توفيق يبقى كل اللي يجيبه ربنا كويس، ولا رأيك إيه؟
أراحني كلام أبي ووافقت عليه

بابا: يبقى اتصل بقى بـ"عمار" واسأله إمتى هنعرف رأيهم؟

أنا: رأيهم؟ أنا حسبتك هتحدد ميعاد الفاتحة

ضحك أبي وقال: ليه هو إنت مادام وافقت يبقى العروسة وافقت؟
عرفت بعد اتصال أبي بأهل سارة أنهم طلبوا أسبوعا لإبداء رأيهم وعاد
إليّ توتري، فأنا قد أبديت رأيي المبدئي في اليوم التالي مباشرة، لماذا
تحتاج هي إلى أسبوع؟ أهي محتارة لهذه الدرجة؟ ألم تعجب بي كما
أعجبت بها؟

حاولت أمي طمأنتي بالحديث عن أن الفتيات يأخذن وقتنا أطول من
الرجال في إبداء رأيهن وأن أهلها يجب أن يسألوا عني، فسألتها
غاضبا: ألا يجب أن أسأل عنها وعن أهلها أنا الآخر؟
ردت أمي بأنها تعرف أهلها جيدا وإذا أردت يمكنني أن أتحرى عنها
هي بنفسني

فسألتها: كيف؟

فقلت روح ليها الشغل.. وتركتني أمي لحيرتي وقلقي..

قالت سارة :

اتصل أهل عمر ليعرفوا رأينا وتنفست أنا الصعداء؛ فمعنى اتصالهم أن
عمر وافق عليّ ويريد أن يعرف رأيي.. انزاح من على قلبي هم ثقيل..
كنت مرعوبة من فكرة أنني أعجبت به وهو قد لا يعجب بي، على
الرغم من كلمته: أشوفك قريب يا سارة

بعد جلسة طويلة مع أمي قررت الموافقة على قراءة الفاتحة لكي
أستطيع أن أراه عدة مرات قبل أن أوافق على الخطوبة.. ولكن أبي
قرر تأجيل إخبارهم بقراري إلى أن يذهب إلى عمل عمر ويسأل عنه..
وسمعت من أمي خطة أبي لمعرفة كل شيء عن عمر من زملائه
ورؤسائه في العمل، بل وجيرانه كذلك، فأبي رجل طيب وهادئ ولم
أتوقع أن يتحول إلى المحقق "كولومبو" من أجلي
قارب الأسبوع على نهايته وأشعر (قليلا) بأني أريد أن أرى عمر

الجزء الرابع

قالت سارة :

تحرى كولمبو (أبي سابقا) عن عمر فوجد أن سيرته ممتازة بين جميع معارفه ومن ثم اتصل أبي بعمي وأخبره عن موافقته واتفقا على قراءة الفاتحة يوم الإثنين القادم، وظل أبي يتحدث مع عمي على التليفون قرابة نصف الساعة حيث إن كليهما يهتم بمشاهدة القنوات الإخبارية وكانا يتناقشان حول برنامج ما يبدو أن علاقة أبي بعمي ستتوحد قبل أن تتوحد معرفتي بعمر ،أخبرني أبي بعد إنهاء المكالمة أن عمي ووطنط وعمر يسلمون عليّ ،شعرت بالاشتياق لرؤية عمر مرة أخرى، إلا أنه -بالطبع- لن يكون بيننا أي اتصال قبل قراءة الفاتحة

قال عمر :

لم أحاول التحري عن سارة لأنني أولا ارتحت لها، وثانيا أُمي تعرفها وتعرف والدتها، وثالثا أنا ماعرفش ازاي أتحرى عن حد ولكني -للحق- فكرت أن أذهب لأراها وهي خارجة من عملها فقد شعرت بأنني بحاجة لأن أراها شيء ما جعل قلقي يزول من جهة موافقتها عليّ أم لا.. فأنا أظن أنني تركت لديها انطبعا جيدا وجاء الخميس موعد رد عائلة سارة علينا وجلست بجوار أبي وهو يرد على تليفون عمي. ظلا يتحدثان في بداية المكالمة عن برنامج سياسي ما وأنا جالس على الشوك في انتظار الجواب. وأخيرا سمعت أبي يضحك ويحمد الله ويقول له عن سعادته بالنسب المرتقب بيننا، فالتقطت أنفاسي وخرجت إلى البلكونة كنت أشعر شعورا غريبا وكأن كل شيء يبرق أمامي أحسست أنني أريد أن أحضن العالم كله وأقبله. كنت أعرف أنني سأبدأ مشروع حياة وأني سأكافح من أجل تجهيز نفسي إلا أن هذا الشعور الغامر بالسعادة أنساني أي قلق وسألت نفسي: كم

سأنتظر لأقف مثل هذه الوقفة مع سارة في بلكونة منزلنا؟

قالت سارة :

هل يُعقل أن أحب شخصا رأيتَه لمرة واحدة؟

أم أن هذا الشعور بقبوله الشديد ناتج عن صلاة الاستخارة؟

هل الله يعطيني إشارة بأن عمر لي وأنا له؟

أنتظر يوم قراءة الفاتحة بسعادة شديدة. ولم أعد أعاني من الحموضة

الحمد لله

يوم قراءة الفاتحة

قال عمر :

جاء الإثنين الغالي

احترت في الهدية التي يجب أن أقدمها لسارة أخبرتني أمي بأنه يمكن

أن أشتري لها خاتما لقراءة الفاتحة وأخبرتني أنها يمكن أن تنزل

وتختاره لي ولكني أخبرتها أنني سأشتريه بنفسي ذهبت إلى الصائغ ولم

أكن أعرف مقياس إصبع سارة إلا أنني حاولت التخمين قياسا على حجم

يديها كنت أريد خاتما مميزا فكرت بأن يكون خاتما ذا فص مثل خواتم

الزواج التي أراها في الأفلام الأجنبية، إلا أنني وجدت خاتما عليه

فراشة تبدو وكأنها حقيقية، لا أدري لماذا ذكرتني الفراشة بسارة،

فدعوت دعاء الاستخارة واشتريت الخاتم

يارب يعجبها

قالت سارة :

لا أدري ماذا يجب عليّ أن أردي في قراءة الفاتحة. هذه المرة كنت

أريد أن أبدو متأقّة

بعد تفكير ومحادثات مع صديقتي ومع ماما ومع المرأة اخترت طقمأ
لبنى اللون ووضعت بروشا على هيئة فراشة يشبك الطرحة مع البلوزة
يا ترى عمر بيحب اللون اللبني؟
يا رب.. يا رب.. يا رب خليني فرحانة النهارده

قال عمر :

أحضرت علبة شيكولاتة ونحن في طريقنا إلى بيت سارة
في هذه المرة كان معي أولاد عمي في سيارتنا وكذلك أختي. بينما كان
أبي وأمي في سيارة عمي وزوجته يلحقون بنا
في هذه المرة ظل أولاد عمي يثرثرون معي وظللنا نضحك طوال
الطريق ونحن نسمع ليلة من عمري لعمرو دياب
عندما دخلت منزل سارة هذه المرة كنت أكثر راحة
كان المنزل مزدحماً نسبياً عن المرة السابقة حيث حضرت خالة سارة
وزوجها وأعمامها الثلاثة
عندما دخلت كانت سارة تكلم أحد أعمامها في ممر يطل على
الصالون، التقتت ورأيتي وأنا أتجه صوب الصالون فابتسمت لي
وابتسمت لها
كانت تردي طقما لبنى اللون يجعلها تبدو جميلة كالسمااء. واتسعت
ابتسامتي حينما لاحظت أنها تضع بروشا على شكل فراشة

قالت سارة :

دخل عمر هذه المرة فجأة فقد ظننت أن أبي يفتح الباب لزوج خالتي
الذي وقف على السلم ليدخن سيجارة، حيث إن أمي لا تسمح بالتدخين
داخل المنزل، وكان أبي واقفاً على الباب يتحدث مع زوج خالتي
وصديقه في نفس الوقت حتى يهون عليه وقفة السلم. ولكنني استدرت
لأجد عمر أمامي يبتسم ويحمل علبة شيكولاتة.. لقد زادت معزته في
قلبي لما أتى لي بالشيكولاتة
بعد أن قدمنا الجاتوه والحاجة الساقعة، تحدث أبي مع عمي وتعرف

الجميع على بعضهم البعض وسألني عمر عن حالي
كان الجو مزدحماً هذه المرة، ولكن عمر كان هادئاً ومازالت لديه عادة
اختلاس النظر إليّ

في وسط كل هذا وجدت أبي وعمي يقولان: نقرأ الفاتحة بقي
رفع الجميع أيديهم ليقرءوا الفاتحة ونظرت تجاه عمر فوجدته بالطبع
ينظر لي وقرأنا الفاتحة وأعيننا متشابكة.. وشعرت وكأني خارج كل
زحام الصالون وكأن جسدي كله قد تخدّر

قال عمر :

قرأتُ الفاتحة وسارة تجلس في عيوني
تجراتُ هذه المرة ونظرت إليها بثبات أثناء قراءة الفاتحة، ولم تبتعد
عني بعينها

أخرجتُ الخاتم وقدمته لسارة التي ضحكت وقالت والدتها: إنت كنت
عارف إن سارة تهلبس بروش على شكل فراشة ولا إيه؟
ولكني لم أكن أعرف، أنا حتى لم أعرف رقم تليفونها وخفت أن يظن
عمي أنني اتصلت بها من ورائه فأنكرت على الفور فضحكت سارة
وضحك الجميع.... وشاركتم الضحك

قالت سارة :

لم أصدق نفسي عندما رأيت الخاتم، فقد كان جميلاً جداً. فأنا أحب
الفراشات بشدة

لقد أتى لي عمر بشيكولاتة وفراشة من ذهب
يبدو أنني سأحب هذا الفتى

الجزء الخامس

كلمني ع التليفون

قالت سارة :

لا أصدق أنه قد تمت قراءة فاتحتي بالرغم من أنني قرأتها معهم وإن كنت لم أع منها سوى "الحمد لله" .. كنت أنظر إلى خاتم الفراشة على يدي باستغراب. لقد امتلكت عدة خواتم ولكني لم أشعر بهذه المعاني التي أحملها من قبل

أشعر أن عمر وضع علامة عليّ تشير إلى أنني أصبحت له ولكن... لكن عمر لا يحمل أي علامة تشير إلى أنه أصبح لي.. ربما أقوم بعمل علامة في وجهه عندما يزورنا في المرة القادمة!! أم أنه قد يعتبر ذلك فظاظة مني

يا ربي لا أستطيع أن أكون جادة حتى عند التفكير في مستقبلي. لكني لم أره سوى مرتين وادبست ووافقت على قراءة الفاتحة كل هذا بسبب حماس أبي له وألفته السريعة مع والده

أه يا عمر..... قلبي بيرفرف لما بافكر فيه، وبالرغم من ذلك فمازلت أشعر بالقلق بسبب موافقتنا السريعة، إلا أن أمي أخبرتني أن الفاتحة مجرد ربط كلام" ليتسنى لي لقاء عمر عدة مرات حتى أوافق على إتمام الخطوبة

أنتظر مكالمة عمر على التليفون ولا أدري كيف سأبدأ أي حوار معه؟

قال عمر :

الغريب أنني لا أشعر بشيء مختلف لكوني أصبحت (قاري فاتحة) لم أتعرف على سارة بشكل عميق، وإن كنت أشعر بشيء لا أستطيع وصفه يثير البهجة في قلبي كلما مرت على بالي، وما أكثر المرات

التي تمر فيها على بالي، بل إنها بالأحرى تسكن حاليا في بالي المفترض أنني سأتصل بها لتتوسط معرفتنا قبل إعلان الخطوبة وهذا ما يثير توترتي فأنا في العادة "دمي خفيف" وكثير الكلام ولكن أخاف أن يجعلني التوتر أحرص كما حدث في لقائنا الأول. أخاف أن أبدو سخيفا وثقيل الظل. فالبينات لا تحب ثقيلي الظل كيف أستطيع أن أظهر جمال شخصيتي الرائعة في حديثي معها
" افتح عليّ يا رب "

قالت سارة :

المفروض إنه يتصل بالتليفون على البيت، لأننا لسه ما عرفناش موبايلات بعض.. الواحد محرج شوية، مش علشان هاكلمه، فأنا بعون الله أكلم الأسد بس وهو في القفص طبعا المشكلة هي وجود بابا. كيف سأحدث " راجل" في وجود بابا؟
هو صحيح راجل طيب.. لكن... المشكلة الحقيقية هي كيف سأحدث مع عمر؟

لا أريده حديثا عاديا، أريد أن أستخرج منه كل أسرار شخصيته وأعرف عيوبه وأريده أن يعرفني جيدا، فهو لم يعرف سوى سارة الهادئة الخجول سأتصل بإحدى صديقاتي المخطوبات لعلها تفيدني في اختيار موضوعات للحوار ووقعت القرعة على فاطمة"، المخطوبة الأزلية منذ كنا في الصف الأول الجامعي وحتى الآن، وقد انفجرت فاطمة في الضحك عندما عرفت طلبي منها وقالت لي ساخرة: عايزة تعرفي كل ده من أول مكالمة؟ يا بنتي إنتي يادوبك في مرحلة النححة.. إنتي وهو هنتنححو على بعض! قدامك شوية حلوين عقبال ما تعدي مرحلة وش القفص، ده أنا يا اللي مخطوبة بقالي سنين لسه باشوف العجب من حسن"، يا بنتي إنتي دخلت مشوار المليون خطوة وإنت يادوبك في أول خطوة طبعا ارتفعت معنوياتي جدا بعد مكالمة فاطمة

قال عمر :

رجعت من الشغل واتغديت ونمت وصحيت والمفروض أكلم سارة،
اتصلت بالرقم وأنا بادعي إنها هي اللي ترد، وبالطبع ردت والدتها.. أنا
عارف حظي.. فسلمت عليها وسألت عن عمي وسألتني هي عن والدي
ووالدي

ثم سادت لحظة صمت محرجة

حيث تنتظر هي أن أطلب الحديث مع سارة، بينما أنتظر أنا أن تتفضل
هي من نفسها بنداها. تنحنحت مرتين وأخذت نفسا عميقا و... قبل أن
أنطق، قالت هي: طيب هناديلك سارة

تألمت أذناي حينما انطلق صوت موسيقى الانتظار المزعج والمفاجئ
ثم انتهت الموسيقى وسمعت خروشة ثم صوت سارة

سارة: السلام عليكم

أنا: وعليك السلام ورحمة الله وبركاته

سارة: ازيك يا عمر

أنا: الحمد لله... ازيك إنت؟

سارة: الحمد لله، وبابا وماما عاملين إيه؟

أنا: الحمد لله

سارة: وإخواتك؟

أنا: الحمد لله

سارة: إنت بتختم الصلاة يا عمر؟

أنا (بدهشة): لأ.. إيه؟

سارة: أصلك مابتقولش غير الحمد لله، فحسبتك بتسبح بعد الصلاة ولا
حاجة

فهمت الدعابة وضحكت بشدة، وبدأت أسألها هي الأخرى عن أحوالها
وعن عملها وكذلك تحدثت هي و... استمرت المكالمة ٦٦ دقيقة

والحق أنني لم أرد إنهاء المكالمة، إلا أنني لاحظت أن والدتها دخلت

إليها ووجهت إليها الكلام، فخشيت أن أسبب لها الحرج وأخبرتها بأني سأحدثها غدا. وبالطبع كانت المكالمة وكأنها مع واحد صاحبي وبخاصة أنها لا تكف عن السخرية وإطلاق النكات، مما جعلني أبادلها الضحك

وبالتالي لم تكن المكالمة رومانسية على الإطلاق، ولكني استطعت أن أستجمع شجاعتي وأن أقول لها: هتوحشيني قوي لحد بكره.. وقفلت الخط سريعا وكان والدتها ستجذبني من ملابسي من خلال السماعه

قالت سارة :

لم أتخيل أن تسير المكالمه مع عمر " على هذا النحو كنت أغسل المواعين في المطبخ، بينما أفكر أنه لو اتصل الآن سيكون شيئا شاعريا جدا أن أتلقى أول مكالمه من خطيبي وأنا أقف على الحوض

وبالفعل اتصل عمر أثناء غسيلي للبراد.. بدا محرجا في بداية الحديث ولكني كسرت الجليد وضاحكته، واتضح لي بعد ذلك أثناء المكالمه أنه "واد دمه خفيف"، وبالطبع هذا ليس تقليلا من شأنه، فهو يبدو رجلا حتى في هزازه

وبعد تبادل الحديث وتبادل أرقام الموبايلات.. حيث أخبرتني أمي قبل المكالمه بأنه يمكنني تبادل أرقام الموبايل معه.. بعد كل هذه الثرثرة أنهى مكالمته بجملة تختلف عن جو الشقاوة الذي ساد المحادثة وقال لي برقة إنه سيفتقدني

يا ربي دايمًا ينهي كلامه بجملة تخلي قلبي يتهز.. يبدو أنها صارت عادة لديه... وقاطعت أمي تأملاتي الرومانسية بعد المكالمه -وكم تعددت مقاطعتها لي أثناء المكالمه!- وقالت لي: إيه كل الضحك ده يا

سارة؟ هو إنت بتكلمي فاطمة" ولا مروة؟ مش تعقلي شوية ظننتها في البداية ستحدث عن طول وقت المكالمه ولكنها أحرجتني بحديثها عن كثرة ضحكي، هل يمكن أن يظن عمر أني أضحك أكثر من اللازم؟ لكنه كان يضحك هو الآخر

يووووووه هو كل شوية قلق

رن.. رن.. رن... وفرحني

قالت سارة :

في العادة تعبر الأغاني عن المشاعر، ولكن هذه المرة عبّر إعلان
خطوط تليفون عن مشاعري

"رن.. رن.. رن.. وفرحني"

يشدو بها كاظم الساهر وأنشز أنا بها طوال اليوم مع رنات عمر الكثيرة
على الموبايل

أمس، بعد أن انتهيت من أولى مكالماتي معه أرسل لي رسالة بها دعاء
جميل: اللهم لي أحبة أتذكرهم كلما نبض الفؤاد وحن، وأدعو لهم كلما
دنا ليل الظلام وحن.. إلهي ظلل أحبتي بالغيوم وأبعد عنهم كدر الدنيا
والهموم.. أدخلنا الله جميعا من باب الريان وأعتق رقابنا من النار

رسالة دينية وإن كانت تبدأ بـ"أحبة"، واخذين بالكم؟

أما اليوم فقد رن عليّ ٨ مرات حتى الآن، أما بالنسبة لي فقد رننت له
مرة واحدة... لا أدري لماذا... "ثقل" كما يقال

للحق أشعر بالخجل من أن أرن عليه كثيرا. ولكني فرحانة أوي
برناته.. بالطبع أنا في عملي وزميلاتي يلاحظن أنني أبتسم بلا داع

مرات عديدة

أبتسم عندما أتذكره

وأبتسم عندما يرن

وأبتسم عندما لا يرن

"باين عليّ اتجننت"

آآآآه لو تدوم سعادتي هذه للأبد

وصلتني رسالة جديدة من عمر، جعلتني لا أتمالك نفسي من الضحك و
(اضطرت) بعدها أن أرن عليه مرتين

كانت الرسالة تقول: كده مش حلو.. لا رنة.. ولا ألو.. ولا علينا
تسألوا... طب حتى رنة واقفلوا
فكرت أن أرسل له رسالة حتى لا يظن أنني بخيلة ولا أريد أن أضيع
رصيدي

احترت هل أرسل له رسالة دينية أم رسالة ضاحكة. في النهاية قررت
الرد على رسالته كالتالي: قلت للطير المسافر وصل سلامي للغالين....
قال لي سواق أهلك أنا؟

قال عمر

:

بعد أن اضطررت لإنهاء حديثي مع سارة قمت بحفظ رقم تليفونها
المحمول على تليفوني على الفور
أحببت أن أظهر لها اهتمامي! ومشاعر أخرى بالطبع، فأرسلت لها
رسالة تحمل دعاء "للأحبة" .. لم تقم بالرن عليّ فظننت أنها لم تقرأ
الرسالة بعد

في اليوم التالي قمت بالرن عليها مرات عديدة ولكنها لم تجبني سوى
برنة واحدة.. بصراحة غضبت
"هي مش معبراني ليه؟"

كان هذا السؤال ينجزي وكأنه شوكة
سألني زميلي في العمل عن سر تجهمي، لم أخبره بالسبب... لا أعتقد
أنه يصح أن أتحدث عن مشاكلتي مع خطيبتي مع أحد
..... ولكن

مع منتصف اليوم لم أستطع أن أتحمل تجاهلها، فكرت أن أحدثها على
الموبايل ولكن كرامتي "نقحت" عليّ. لم أجد سوى أحمد.. صديقي
الحميم والذي خطب منذ عدة أشهر لأتحدث معه. وأحمد يعمل معي في
نفس الشركة ولكن في قسم آخر.. رننت عليه، ففهم أنني أريده وتقابلنا
في كافيتيريا الشركة كالعادة

وجدني مغتاظا فقال: أهلا... مش بدري على فردة الشراب المقلوبة دي

أخبرته بالموضوع فضحك وأجابني: مشكلتك يا عمر إنك أبيض يا
ورد... بس هي مش مشكلة قوي يعني.... باين إن سارة كمان أبيض يا
ورد زيك.... إنت عمال ترن ترن على البنات عشان دي أول مرة
تعرف بنات وعايز تحس إنك بترن وبيتزن عليك، وسارة غالبا مش
متعودة على الكلام ده ومحرجة ترن عليك كثير..... ياسلااااااا
نزل عليّ كلام أحمد كالبسم و غضبت من نفسي لأنني غضبت من
سارة.. وكان أحمد نعم العون حتى إنه بعث لي رسالة لعلاج هذه
الحالة.. كما قال ، وقمت أنا بإرسالها لسارة
وعدت للتخليق فوق السحاب عندما ردت عليّ سارة هذه المرة برنتين
ورسالة دمها خفيف

قالت سارة :

أربع رسائل في يوم واحد.... كثير برضه! الواد ده ماشي بموبايل خط
ولا بيزنس ولا إيه؟

هو صحيح إني فرحانة جدا بكل هذا الاهتمام... لكن هي دي المشكلة..
أنا باخاف لما بافرح قوي.. باشعر إن فيه حاجة غلط
ماسورة الرسائل اللي انفجرت دي مش مطمئاني
أخاف أن يكون عمر حالما أكثر من اللازم.. قد يبدو كلامي غريبا
ولكني أحب الرجل الراسي أريد رجلا يساندني على أرض الواقع.. لا
أحب الرجال المغرقين في الرومانسية

قال عمر :

لم يتهمني يوما أحد بالرومانسية، ولكني مع سارة أخاف أن يكون هذا
عبيا

لست قاسي القلب بالطبع ولكني لا أجد أن الكلام الرومانسي الكثير
يعني شيئا. أشعر أنني أحبها وغالبا ما سيزداد هذا الحب مع الأيام
ولكني لا أحب كلمة "أحبك" التي تتكرر كثيرا بين الأولاد والبنات.
ولكني أخاف أن يجعل ذلك سارة تكرهني ولذا قررت أن أكون

رومانسيا معها في رسائل الموبايل
أرسلت لها كل رسائل الحب التي وجدتها ذلك اليوم، وكانت أربع
رسائل

..... أربع رسائل في يوم واحد
"كثير.. مش كده؟"

أدركت هذا عندما وصلت للمنزل مساء. قد تراني سارة الآن "مدلوقا".
ولكن.. لا

هي لا تفكر بهذه الطريقة
أو... ربما هي تفكر بهذه الطريقة...
لاحول ولا قوة إلا بالله... كنت قد قررت أن أتصرف بمثالية في هذه
العلاقة ولكن ها أنا وقد بدأت بخطأ.... أففف

الجزء السادس

قالت سارة :

مكالمة أخرى مع عمر على تليفون البيت
هذه المرة اتصل أثناء مشاهدتي لمسلسل الرعب الأجنبي الذي أتابعه
بشغف، ما علينا سأسأهده في الإعادة
وجدته طبيعياً...

أعني ليس حالما غارقاً في الرومانسية كما أوحى لي الرسائل.. ارتاح
قلبي لذلك، فأنا لا أحب الرجال معسولي اللسان.. حدثته عن مشاكل في
عملي وأسداني بعض النصائح المفيدة بجانب بعض النصائح غير
المفيدة
-ولكني لم أخبره بذلك بالطبع-

إلا أنني ذهلت وزاد إعجابي به عندما حدثني حول الاحتلال في العراق
ووضع الانتخابات الفلسطينية.. إنه يعرف ما يتحدث عنه وله آراء
خاصة رائعة ولا يدعي معرفته بكل شيء، مثل الذين يتحدثون وكأنهم
كانوا مع بوش لحظة إعلان الحرب
أعجبتني سعة اطلاعه، وإن كنت أحببت قليلاً عندما عرفت أنه لا يهتم
بالكرة، وأنا التي كنت أحلم بأن أذهب أخيراً للاستاد لأشاهد المباريات
من هناك بعد زواجي. إلا أنني -للحق- احترمتها
فأنا لا أتخيله يجلس مثلي أمام التليفزيون يكيل السباب للاعبين الفريق
المنافس والحكم الظالم دائماً
في وسط الحديث تطرقتُ إلى موضوع الرسائل.. فسكت قليلاً ثم قال
بلهجة شديدة الرقة والعذوبة: زودتها شوية... مش كده؟
ولم أتمالك نفسي من الضحك
أحياناً ينتاب الشخص نوبة غباء يندم عليها كثيراً فيما بعد... وكانت هذه
إحدى نوبات غبائي كيف يكون هذا هو رد فعلي على هذه الرقة؟..

بالتأكيد سيظن أنني بليدة المشاعر
ارتبك قليلا بعد ضحكتي الغبية ثم تجنب الحديث عن رسائله وشكرني
على رسالتي وأثنى على خفة دمي الذي كان يغلي في هذه اللحظة من
شدة غيظي من نفسي ومن ردود فعلي الغبية
انا ح اجى لكم بكرة شوية يا سارة -

قالها عمر لى فى التليفون فرديت باستغراب: ليه؟
وطبعاً كان رد غريب جداً فقلت له بسرعة: تشرف طبعاً
وقفلت التليفون وانا سعيدة جداً انى ح اشوف عمر بكرة لأول مرة من
قراءة الفاتحة الظاهر انه واحسنى لا الحقيقة مش الظاهر انا فعلاً نفسى
أشوفه

قال عمر :

رد فعل سارة غريب جداً ياترى هى مش عاوزة تشوفنى فعلاً علشان
كده اتخضت؟ ممكن تكون حست انها اتسرعت فى الخطوبة مثلاً
طب ايه المطب ده ؟

دى هى واحسانى فعلاً ج يبقى شكلى ايه لو قابلتتى ببرود ؟ بس هى
كانت طول المكالمة سعيدة
اووف.. البنات دي عاوزة خريطة علشان الواحد يفهمهم.. احسن أصلى
ركعتين وانام علشان عندى شغل بدرى

قالت سارة :

عملت ماسك زبادى بالعسل قبل ما انام مع ان بشرتى مش محتاجة بس
استعداد نفسي للقاء عمر المنتظر

ماما دخلت لفتنى ملزقة كده قالت لى مالك يا سارة قلت لها: اصل عمر
جاي بكرة يا ماما

خرجت من الاودة وهى بتقول لا حول الله يارب
غسلت وشى من الماسك وغمضت عيني وطفيت النور بس ما جاليش

نوم خالص.. ايه القلق ده ؟

احاسيس ملخبطة جدا

جوايا فرحانة انى ح اشوفه وفى نفس الوقت سؤال بيزنّ فى عقلى:
خلاص هو ده الانسان اللى ح اكمل معاه حياتى كلها لحد ما اعجز زى
ماما وبابا ؟

ده انا تقريبا ما اعرفوش !! بس هو مؤدب وطيب
ماهو كلهم بيكونوا كده فى الأول !!! على رأى صديقاتى ذوات الخبرة
فى الارتباط

حطيت المخذة على دماغى علشان اهرب من التفكير وانام

قال عمر :

يااااه ده انا تقريبا مانمتش خالص وحاسس بصداع رهيب وعندى شغل
بعد نص ساعة

أدى اللى خدناه من الخطوبة

ما انا كنت حر نفسى وأخر رواقه كل القلق ده ولسه قراءة فاتحة امال
لما أخلف ٥ ولا ٦ عيال ح اعمل ايه ؟ أكيد ح اكون مت من زمان

قالت سارة :

قمت من النوم بعد ما صحيت يبجى ميت مرة وعندى حموضة كبيرة
شربت سفن اب على الريق وطبعا كانت فاتتنى صلاة الفجر من النوم
المتقطع

اتوضيت وصليت شعرت بهدوء واستعدت فرحتى بلقاء عمر النهاردة

يارب فرّحنى النهاردة يارب..

قال عمر :

تالت فنجان قهوة بأشربه والصداع ابتدى يروح شوية
اه لو سارة تدينى حتى رنة تعرفنى انها عاوزة تشوفنى هى كمان

فضلت ماسك الموبيل وسرحان لحد ما فوقت على صوت زميلي بيقول
: يا بختك يا عم تلاقي العروسة صبحت عليك بيجي ميت مرة.. تيجي
مراتي تشوف عمرها ما بنتصل بي الا لو كارثة حصلت ده انا حاطط
لها تون سرينة اسعاف.. هههههههه
رميت الموبيل وقلت الصيت ولا الغنى !! يلا بقى يا سارة ربنا يهديكى

قالت سارة :

الوقت بيعدى بسرعة كدة ليه ؟ الساعة ٤ وعمر جاى الساعة ٨ طب ح
البس ايه ؟ وح نقعد فين ؟ مش معقول نقعد لوحدنا فى الصالون حرام
طبعا وكمان انا اتكسف جدا لا أكيد كل العيلة ح تقعد على قلبنا طب
حنتكلم فى ايه ؟
التليفون ببسهل الموضوع لكن وجها لوجه دى صعبة شوية
يااه ايه الفلق ده كله ؟

ماما بتبص لى من بعيد و عينيها بتضحك على وبتقول فى سرها البنات
اتجننت قمت استحميت واسترخيت شوية وقعدت أنشف شعرى
بالشوار وأعمله كذا تسريحة مع انه مش ح يشوفه لأنى ح اكون
لابسة الحجاب طبعا بس عاوزة أحس انى جميلة النهاردة ونفسى
أشوف ده فى عينيه

قال عمر :

ياترى ح أجيب ايه معايا وانا رايح ؟ آخذ شيكولاتة ؟ ولا أبقى
رومانسى واخد ورد
طب أنا نفسى أشتري هدية لسارة تفكرنا دايمنا باليوم ده أشتري لها ايه
؟

قعدت أفكر وانا فى العربية وراجع من شغلى لحد ما لقيت محل هدايا
دخلت و جبت بوكية ورد أنيق ودورت على هدية سارة احترت شوية
وبعدين لقيت دبذوب ضخم أبيض حاضن قلب أحمر كان ضخم جدا
وغالى جدا كمان !!! لكن تخيلت فرحتها بيه

يارب يعجبك ياسارة..

قالت سارة :

ارتديت عباءة مغربي جميلة مطرزة بالقصب أهداها لي خالي من
الخليج

لم أرتدي تايرير أو ما شابهه مش عارفة ليه يمكن كنت عاوزة أحس أني
لا أستقبل ضيف غريب بل من أهل البيت

وضعت مكياج خفيف جدا مجرد انه يظهر وجهي نضر لا أكثر ولقيت
الطرحه بطريقة جديدة زادتني أناقة ونظرت في المراية ووجدت بريق
جميل في عيني لم أره من قبل

يارب اسعد كل البنات زي

وأفقت من سرحاني على صوت جرس الباب وصوت أمي يقول :

..عمره ياسارة

الجزء السابع

قالت سارة :

ازيك يا سارة.. ياه ماشاء الله -

قالها عمر بتلقائية كبيرة وهو يسلم على جعلت اخوتى بيتسمون وانا وجهى احمر من الخجل وفوجئت ان يمدحنى هكذا أمام الجميع !! لكنى كنت سعيدة جدا بهذه الجراءة أو التلقائية لا أدرى ! ومددت يدي أسلم عليه وأكد لى لاحظ ارتعاش يدي وارتباكى يااه فعلا التليفون أرحم من اللخبطة دى

قال عمر :

بجد فوجئت بجمال سارة اليوم وجهها نضر ولامحها تنطق بالجادبية والجمال رغم انها لا تضع ماكياج والحمد لله.. لم استطع ان أخفى سعادتى عندما رأيت وجهها مرة ثانية والمرة دى أشعر انها ملكى فازدادت جمالا فى عيني.. لكن أكيد والدتها وأخواتها بيقولوا على مدلوق جدا

لأ.. امسك نفسك شوية يا سى عمر ما تكسفناش

قالت سارة :

الله عمر بجد رقيق جدا جايب ورد معاه كنت خايفة يجيب فاكهة بقى وبطيخة والفيلم ده ونظرت الى الهدية الكبيرة فى ورقها اللامع وفرحت انه فكر يشتري لى هدية ده يدل انه انسان كريم ورقيق .. الحمد لله

يارب تفضل كده يا عمر

ياترى ح نقعد فين؟ أكيد مش لوحدها طبعاً طيب أقعد فى الكرسى اللى جنبه ولا بعيد طب بابا موجود ازاي أقعد جنب عمر فى وجود بابا؟

ياسلام على الهنا.. بابا حسم الحدوتة وقال: تعالى أقعد جنبى هنا يا عمر

قال عمر :

يا سلام على الهنا ح أقعد جنب حمايا العزيز اهي دي فيها ساعتين قناة
الجزيرة وساعتين عن مستوى الزمالك المنحدر
وبعدها أكيد ح اكون استأذنت وروحت.. يا خسارة الورد والهدية
الحمد لله سارة قعدت فى الكرسى المقابل لنا أنا وعمى لا أدرى هل
حمايا لاحظ انى أختلس النظرات الى وجهها؟
بجد وجهها يحمل ملامح طفولية تنم عن الشقاوة وخفة الدم وايضا
جاذبية كبيرة تجعلك لا تمل النظر لها.. وكنت غير منتبه الى كلام
حمايا المطول غصب عنى وأرد فقط ب: طبعاً طبعاً يا عمى.. فعلاً فعلاً
يا عمى.. ايوة فعلاً يا سارة

وانتبهت الى خطأى واحمر وجهى من الخجل ولاحظ عمى هذا
وضحك وقال لى: ده انت مش معايا انا يا سيدى طب لما أسيبكم
تتكلموا شوية وأقوم اتكلم فى التليفون

قالت سارة :

ضحكت جدا على عمر وفرحت بصراحة ان بابا قام وقعدت جنب عمر
ولاحظت سعادته بهذا وقال لى مباشرة: ازيك يا سارة افتقدتك جدا من
المره اللى فاتت
يااه..

كلمة الافتقاد دى كبيرة اوى احلى بكتير من وحشتينى.. كان نفسى أقول
له وانا كمان لكن اتكسفت جدا.. أول مرة أحس انى بنوته بقى
وبتكسف.. دول كانوا مسمينى فى العيلة الكابتن من كتر تهريجى
الظاهر انى ح أكتشف سارة جديدة خالص ما عرفتهاش قبل كده

قال عمر :

أنا جبت لك هدية يا سارة يارب تعجبك.. بتحبى الدباديب ؟

فوجئت ان سارة نطت من مكانها وحضنت الدبوب وقبلته ونيمته فى
حضنها وقالت بسعاد طفولية: الله ده تحفة يا عمر بجد يجنن
فرحت جدا برد فعلها الطفولى الجميل ورغم ان الجميع كانوا حولنا الا
انى كنت لا أشعر الا بى وبها فقط

يارب ما تتغيريش ياسارة وتفضلى لذيزة كده على طول.. مش عارف
ليه ساعتها كنت عاوز أقول لكل العالم ان هذه الطفلة الجميلة طفلتى أنا

قالت سارة :

ايه الجنان ده؟

أكيد ح يقول عليّ عيلة دلوقتي

طب ماهو اللى غلطان كان لازم يجيب دبوب يعني ؟ ده أنا باموت

فيهم.. يوووووه هو أنا لازم أفضل محتارة على طول؟

لازم يتعود على زى ما أنا !! بس كل صديقاتي قالوا لى اتقلي واعلمي

فيها الراسية العاقلة.. وماما بتبص لى من بعيد نفسها تقتلني !! بس

عمر فيه فى عينيه نظرة حنان جميلة بتخلينى أطع كل اللى جوايا بدون

اى تصنعّ وده اللى مخلينى معجبه بيه

قال عمر :

ياااه انا نسيت كل الموجودين ونسيت الوقت معقول بقى لنا ساعتين

بنتكلم؟

انا نسيت انى ضيف ولازم ما أقعدش كثير اوى كده !!! بجد كلام سارة

لذيد جدا وحبل الكلام بيننا ممتد الى مالا نهاية بدون أى تكلف ولاحظت

انها قارئة جيدة مش روشة طحن زى بقية البنات ومخها أبيض ودى

حاجة عاجبانى فيها جدا بتحسنى انى قاعد مع الف بنت: صديقة

وأخت وزميلة وطفلة وأنتى وقريبة ووووو حبيبة

قالت سارة :

عمر مشي من شوية وبجد انا مرتاحة جدا دلوقتي

حسيت انى سعيدة لأننا على درجة كبيرة من التفاهم او على الأقل فيه
ناس باحس انى مخنوقة منهم بسرعة لكن مع عمر لأ
دايما باحس انى على طبيعتى وعاززة اقول له كل اللى جوايا بدون
زواق ومش محتاجة اتكلف اى حاجة علشان أعجبه ومتهيألى دى
حاجة كبيرة ووو

قطع تفكيرى صوت أختى: أبيه عمر على التليفون.. هو لحق وصل
نطيت رفعت السماعه وانا طايرة من الفرح : الو ايوه يا عمر انت
وصلت ؟

عمر: لا باتكلم من عند البقال
ايوه وصلت طبعا انا كنت سايق على ١٢٠ علشان أوصل بسرعة
وأكمل كلامى معاكى دى ماما اتخضت وانا باجرى على اودتى علشان
أكلمك

أنا: مميممم

عمر: ساكنة ليه ؟

أنا: مش عارفة أقول ايه ؟ انا بجد فرحانة وقلقانة ومبسوطة وخايفة

وووو

عمر: ايه الكوكتيل الجامد ده ؟ طب فرحانة ومبسوطة علشان انا شبه
أحمد السقا ماشى.. لكن

أنا: ياعم قول ياباسط أحمد السقا ههههههههههههههههههههه

عمر: كده ياسارة الله يسامحك طب ادينى ضحككك ياستى قولى لى
خايفة من ايه ؟

أنا: خايفة اننا بنقرب لبعض بسرعة أوى وانا ماليش تجارب قبل كده..
فخايفة أكون فرحانة بس بفكرة الحب والارتباط ومش قادرة أقيّم
الموضوع صح واطلع غلطانة فى الاخر

عمر: ما تخافيش من أى حاجة فى الدنيا طول ما انا جنبك يا غالية

أنا: ياااه يا عمر بجد انت اللى غالى..فى سري طبعا

عمر: سارة سامعانى ؟

أنا: ايوه

عمر: بصي ياستي انتي بتعدي الشارع وفيه عربيات؟

أنا: طبعا

عمر: بتدخلني مبنى ما دخلتهوش قبل كده علشان تخلصي مصلحة ليكي ؟

أنا: أكيد

عمر: بتركيبي تاكسي لوحديك ؟

أنا: ايوة ايوة.. ايه الأسئلة العجيبة دي كلها ؟

عمر: طب ليه مش خايفة وانتى بتعدي الشارع عربية تخبطك لا قدر

الله يبقى نبطل نعدى شوارع أحسن.. ولا وانتى داخله مبنى غريب

يحصل لك حاجة ولا فى التاكسي تتخطفى مثلا ؟

يا سارة لو خفنا من كل حاجة عمرنا ما ح نعمل حاجة ابدا وبعدين احنا

واخدين الطريق الشرعى أمام الله وأمام الناس ونيتنا احنا الاتنين اننا

نرضي الله فى الحلال يبقى الخوف والفسل ح ييجوا منين ؟

أنا: أنا خايفة من اختلاف الشخصيات يا عمر يكون سبب الفسل

عمر: بصي ياسارة أكبر غلط كل البنات بترتكبه انها تتجوز واحد

بشخصية معينة وتحلم انها تخلق منه شخصية مختلفة ١٨٠ درجة

مفروض اننا نحب الانسان بمميزاته وعيوبه.. ونتقبله كما هو ونحبه

زى ماهو

أنا: مش بيقولوا مراية الحب عامية ؟

عمر: دي مراية الحب مفتحة ولها عشر عيون بقى انا مش ح اشوف

الانسان اللى باحبه ؟ امال ح اشوف مين يعنى ؟ يعنى انا دلوقتي مش

شايك؟

أنا: ياااااه اول مرة.. يعنى انت بتحبني يا عمر؟؟؟؟.. برضه فى سري

عمر: سارة انتى فين ؟

أنا: انا سامعاك.. انت عارف يا عمر اكثر حاجة بتعجبني فيك ايه ؟

عمر: غير انى شبه احمد السقا ؟

أنا: ههههه برضه مصمم ؟ ماشى يا سيدي.. لا بجد باحس انى باكلم

حد من صديقاتي مش خطيبي يعنى حاسة ان الصداقة بيننا بتكبر كل

يوم ودى حاجة مفرحاني جدا

عمر: على فكرة ده نفس احساسى انا كمان.. عارفة ياسارة مهم جدا ان الأزواج يكونوا اصدقاء ده بيخلى التفاهم بينهم كبير جدا

أنا: انت عارف ياعمر الزواج عامل زى بيت من ٣ ادوار الدور الاول الاعجاب والانبهار والرغبة الشديدة والدور التانى الحب والدور التالت الصداقة.. فلو غبار الزمن والتعود والمشاكل طمس الدورين الأول والتانى لا يمكن ح يوصل للتالت ابدا

عمر: انا بجد لقيت كنز لما لقيتك يا سارة.. انتى بجد مليتى على الدنيا انا حاسس انى مش محتاج حد تانى من الدنيا.. الحمد لله يارب أنا: ربنا يخليك لى ياعمر

عمر: انا لى عندك طلب ياسارة ياريت نخلى حفلة خطوبتنا والشبكة نكتب فيها الكتاب كمان ايه رأيك؟ أنا: كتب كتاب !!!! بسرعة كده

عمر: بصي ياسارة ما تتخضيش.. خدى وقتك وفكرى.. بس انا مش عاوز أغضب ربنا فى حاجة جوايا كلام كثير مش قادر أقوله ليكى.. ونفسي نخرج لوحدنا نشوف العالم مع بعض بعيونا احنا بس ونخلق ذكريات خاصة بينا احنا الاتنين.. وما تفتكرش انى كده بأقيدك او بالزمك بحاجة لا يوم ما تحبى تبعدينى من حياتك ح ابعده بدون قيود أنا: ايوه بس

عمر: بصي ياسارة ربنا هو اللى جمعنا و اعطانا نعمة كبيرة اننا قربنا لبعض بفضلله وحده فمش معقول اننا نشكر النعمة دى بأننا نعمل معصية.. صدقيني لو أرضيناه ح يرضينا.. بصي فكري براحتك وردى علي.. معلش طولت عليكى انا بجد اسف الوقت معاكى بيعدى من غير ما احس.. حاسيبك ترتاحي دلوقتي.. خلي بالك من نفسك أنا: تصبح على خير

عمر: تصبحي على خير يا ملاكي

الجزء الثامن

يوم شراء الشبكة

قالت سارة :

يارب اليوم ده يعديّ على خير !! امبارح زارنا عمر ووالده ووالدته
وكانت زيارة جميلة

أهل عمر فرحانين بيّا جداً وقعدوا مع ماما وبابا وهات يا كلام.. وانا
وعمر انتهزناها فرصة طبعاً وأخذنا جنب بعيد و اديناها رغي وتهريج
لحد ما لقينا صوت الكلام بين الأباء انخفض والوجوه اتوترت شوية
وواضح ان فيه مشكلة فى الجو وكل اللي سمعناه انا وعمر شوية
كلمات زي: لا لا ده قليل اوى !..و: لا ده كده حرام!.. وحاجات زي
كده

حاولنا نفهم فيه ايه مفيش فائدة لحد ما والد عمر ووالدته استأذنوا فجأة
بدون سابق انذار !! وعمر حصلهم بسرعة وانا واقفة فاتحة بقى ومش
فاهمة حاجة خالص

سألت ماما عن اللي حصل ماردتش على وسمعتها بتقول وهى ماشية:
ابتدينا بقى النكد ده ايه وجع القلب ده
ما شاء الله ربنا يستر

قال عمر :

أنا مش فاهم حاجة خالص أقدر أعرف فيه ايه ؟ قلتها لأمي وأبي واحنا
فى العربية اعتراضا منى على نزولهم المفاجيء من بيت سارة ردت
على ماما وقالت لي: مش عاجبهم يا سيدى اننا نجيب شبكة بـ ٧ تلاف
جنيه قال عاوزين شبكة بـ ١٠ تلاف.. قال هو حد لاقى عرسان فى
الزمن ده ؟

قالت سارة :

انا مش عاوزة ذهب ولا مشاكل.. انا عاوزة الموقف ده يعدّي واروّح
وخلص ده الجواز ده كله توتر وحواديت

حمايا قال لي: اختارى يا عروسة الى يعجبك.. وانا اصلا مش باعرف
اقدر قيمة الذهب كويس وخصوصاً انه نار الايام دي

مددت يدي على طقم ذهب ابيض على شكل صغيرة وفيه فصوص
كثيرة وقلت حلو ده.. امتعضت حماتي وقالت: لالا.. الذهب الابيض

مصنعيته غالية اوي والفصوص بتخسر لما تحبّي تبيعيه
بصيت لعمر لقيته ساكت تماماً.. اتضايقت بس قلت عندها حق اشوف

حاجة تانية

اخترت لي ماما طقم آخر وقبل ما ألمسه حماتي العزيزة قالت: لا لا لا
ده شكله ثقيل وغالي جداً احنا ما اتفقناش على كده.. وعمر لا ينطق

بكلمة

اتضايقت جداً.. كان نفسي يقول لها سيببها تختار اللي هيّ عاوزاه لكنه
صامت تماماً

همّت ماما بالكلام لكن بابا منعها كي لا يزيد الجو اشتعالاً وقال لي
اختاري حاجة تانية ياسارة

اخترت واحد تاني لم يعجبني لكن علشان أخلص وخلص وبعد معرفة
ثمنه اعترضت وقالت: لا برضه غالي

انت رأيك ايه يا عمر ؟

قلتها له وكلّي ترقبّ لما سيقول.. رد عليّ وهو يتحاشى النظر اليّ: اللي
تتفقوا عليه انا موافق عليه

يااه هو ده اللي ربنا قدرك عليه ؟

امال امتي ح تدافع عني ؟ قلتها في سرى وكى لا أبكي او انفجر في
وجهه قلت لحماتي اختاري انتي يا طنط اللي يعجبك

وبالفعل اختارت طقم يناسب المبلغ المقدس تماماً ووافقت ماما تحت
ضغط نظرات بابا النارية.. ولم أنظر الى الطقم وتركتهم يكتبون

الفاثورة وجلست فى صالون بعيد فى المحل وأنا أقوم بالبكاء والانفجار
من موقف عمر السلبى فى اول احتكاك حقيقى
ورأيتة قادم بيتسم ويقول لى: مبروك عليكى الشبكة يا عروسة
رديت عليه والكلمات تخرج من فمى مثل الرصاص: مبروك عليك
انت انا مش عاوزاها ولا عاوزاك
!!!!

فى اليوم التالى
قالت سارة :

لم أردّ على مكالمات عمر المستمرة وجعلت الموبيل سايلنت وجلست
فى غرفتى أبكى باستمرار من موقف عمر السلبى
هل سأتزوج رجل بدون شخصية؟
هل حماتى العزيزة هى من ستتحكم فى حياتى؟
ومن يجبرنى على هذا؟

هل هذا موقف عارض ام ان هذه هى الحياة المنتظرة معه؟
يارب انا فى حيرة دلنى ماذا أفعل.. ومسحت دموعى عندما نادى عليّ
ماما: يا سارة عمر هنا تعالى بسرعة

قال عمر :

جلست فى الصالون فى انتظار سارة وانا لا أجد كلام أقوله لها.. شكلى
بجد وحش جداً
هى عندها حق.. لكن لما فى أول مشكلة بيننا تقول لى انا مش عاوزاك
ازاي الحياة ح تستمر بعد كده؟؟

كان ممكن تعاتبينساو حتى تتخانق معايا بينى وبينها لكن تبيعنى كده
على طول؟ كده برضه يا سارة تتخلى عنى علشان الفلوس؟

قالت سارة :

دخلت على عمر وسلمت عليه فى فتور وطلبت من ماما وبابا انهم

يتركوني اتحدث معه بدون مقاطعة علشان ماما كانت ناوية تطلع كل غضبها فيه

دخلت الصالون بدون ولا كلمة وتوقعت ان يعتذر لي عمّا حدث فوجئت به يقول لي بغضب: انتي مش بترديّ على تليفوناتى ليه وكمان تقولى لى انا مش عاوزاك كل ده علشان الفلوس ياسارة ؟ فوجئت برد فعله الغاضب.. هوّ كمان اللي زعلان؟!.. ده بدل ما يصلحني ؟

فلوس ايه اللي بتتكلم عليها يا عمر؟.. انت حتى مش حاسس انا زعلانة من ايه ؟.. انا زعلانة لأنى كنت راسمة لك صورة جميلة في خيالى وفجأة لقيت واحد تانى انا

ما اعرفوش انسان مش بيدافع عني فى وقت انا محتاجالك فيه لقبتك خايف تقول ولا كلمة ولو حتى انك تراضيني والسلام.. وكل ده وتقولى فلوس ؟

رد بغضب أشد وعصبية مخيفة : برضه ده مش مبرر انك تقولى انك مش عاوزة الشبكة ومش عاوزانى فوجئت بغضبه الشديد وعصبيته الكبيرة وأحسست بخوف منه لأول مرة

ولم أجد ما أقوله فانفجرت فى بكاء مرير

فوجدته يخفض من صوته وتلين ملامحه وتتحول الى رقة شديدة وحنان كبير وكأنه اب يخاطب طفاته الصغيرة الباكية: انا اسف جدا ياسارة.. ارجوكى ما تبكيش.. دموعك غالية عليّ جداً.. خلاص بقى انا غلطان.. ارجوكى كفاية انا مش قادر استحمل.. أنا فعلا جرحتك ووضعتك فى موقف محرج بس والله غصب عني.. ارجوكى ياسارة عاقبيني بأي عقاب الا انك تبكي أنا ضعيف جداً امام دموعك.. خلاص بقى انا آسف آسف آسف.. مليون آسف

هدئت قليلا من كلماته الرقيقة واحساسه بالذنب وشعرت بحنانه الكبير الذى احاطنى بدفئه وقلت له بصوت منقطع: كان ممكن يا عمر تنبهني

دي بالصفاء والجمال ده

أنا: يا خبر إيه ده كله؟ لا انت أسهل تقول لي أعيط امتى وانا اعيط من

غير نكد ولا اقسام

عمر: لسه فيه مشكلة كمان

أنا: يارب استر ايه كمان ؟؟؟؟؟؟؟؟؟

عمر: بصي بقى يا ستي انا اتخذت قرار لا رجعة فيه ولا جدال ولا

حتى استعطافات.. إن حفلة خطوبتنا تكون بعد اسبوعين علشان تلبسي

دبلتي للأبد واقول لكل الناس القمر ده ملكي انا.. واكتب على قلبي

لوحة مكتوب فيها قلب مسكون بأجمل ملاك للأبد.. قلتي ايه يا حبيبتي؟

أنا: موافقة يا سى السيد

الجزء التاسع

قالت سارة :

آدي آخرة اللي يسمع كلام العيال.. معقول نلحق نجهّز كل حاجة في الكام يوم دول؟ الله يسامحك يا سارة
هذه كانت عينة صغيرة من القذائف التي تنهال على رأسي كل دقيقة من أمي وابي بعد ما أفنعتهم بكل وسائل الزنّ والالاحاح المعروفة عند البنات ان تكون حفلة خطوبتنا انا وعمر بعد اسبوعين.. يعنى أكسر كلام سى السيد؟

وبعد صاعقة المفاجأة التي هبطت على رأس أمي وأبي من الميعاد المفاجيء العيالي على حد وصفهم وبعد الرجاء المتواصل من جانبي وافقوا على مضض على ان تكون الحفلة في بيتنا على الضيق تجمع الأسرتين فقط.. وأعجبنى الحل ده جدا لأنى أصلاً لا أحب حفلات الخطوبة في الأماكن العامة لأن العروسين لا يكونوا يربطهم شيء وفي بداية التعارف..يبقى ليه نفرّج الدنيا كلها علينا؟.. مش يمكن ما يحصلش نصيب؟؟؟

قال عمر :

الخطوبة فى البيت؟.. ليه بقى ان شاء الله هو احنا عندنا كام عمر؟.. ما ينفعش الكلام ده أبدا هذه كانت عينة صغيرة من القنابل التي كانت تلقياها أمي على أذني عندما علمت بموضوع حفلة الخطوبة المنزلية.. ولما كنت لا أريد ان تتكرر مأساة الشبكة مرة أخرى أخبرت أمي اني انا وسارة متفقين على هذا ولا داعي أبدا ان تفتح هذا الموضوع معهم.. وبعد الحاح كبير جداً وافقت على مضض مشيرة الى اني من دلوقتي ح امشى ورا كلام الست هانم طبعاً عملت نفسي مش سامع ولا عارف مين هي الست هانم المذكورة

اللي وريتهولها والكساح الذي أصابها.. لا و ح اتفرس اني اتصلت
بعمر لقيته صاحي من النوم تعبان علشان نزل اشترى البدلة فى نص
ساعة زي ماتوقعت لا صحيح بجد الرجالة دول بيتعبوا

قال عمر :

انا مش عارف سارة مكبرة موضوع الفستان ليه؟.. ما أي حاجة
وخلص.. صحيح البنات دول فاضيين ورايقين اوي.. وبعدين ح
تفصله اخيراً وما رضيتش تقولي لونه ايه علشان المفاجأة ربنا يستر
ويليق على البدلة أحسن بيقى شكلنا آخر بيئة بجد البنات دول عليهم

تقاليع عجب

قالت سارة :

أمامي ألف مجلة أختار منها الموديل وفي الآخر رميت كل المجالات
وأخرجت قلم وورقة وقعدت أرسم مليون تصميم وكلهم طلعا وحشين
جدا.. ياربي ليه البنات على طول تعبانين فى كل حاجة من الصغيرة
للكبيرة؟

انا ح اسيب صاحبة الاتيليه تختار حاجة مناسبة ليّ وخلص.. هو
يعني فرح الأميرة ديانا؟؟

قلتها فى سري وهي تجلس أمامي من عشر ساعات تنتظر اختياري
النهائي وهي ح تطقّ مني وبعد طول عذاب "اخترنا" الموديل انا وهي
وتنفست الصعداء وهي تكاد تطردني من المحل وتقول بابتسامه
طهقانة: والفرح امتى ان شاء الله يا عروسة؟

رديت وانا اكاد اجري من أمامها من رد فعلها المتوقع: بعد عشر أيام
وكان الرد: ايبيبويه مووووش ممكن ابداءااا

قال عمر :

ح اضطر أسيب ذقني ما احلقهاش اليومين دول ولا شعري كمان حسب
تعليمات الكوافير واستحمل التريقة من اصحابي والعيلة عندنا

يالاً اهو الواحد لازم يضحّي ويتعب علشان يتجوّز

قالت سارة :

خلّصت كل انواع الماسكات والسنفرة والكريمات المعروفة والمجهولة
وأى واحدة كانت بتقترح عليّا وصفة للبشرة او الايديين اجرّبها فوراً..
واصبحت غرفتي مطبخ به أعاجيب الدنيا السبعتناشر من قشر خوخ..
بياض بيض.. جلسرين وليمون.. زبادي وعسل واي شىء أجده فى
التلاجة عند ماما انقض عليه فوراً واجري عليه تجاربي الجهنمية
انا عاوزة اعرف كل البنات بيتعذبوا العذاب ده ولاّ انا بس اللي لاسعة؟
بس كله يهون علشان خاطر عيونك يا عمر

ترتيبات يوم الخطوبة

قالت سارة :

أكاد افتح عيوني بالعافية وأغالب النوم بقوة وانا جالسة عند الكوافيرة
امبارح سهرت فى الاتيليه علشان أخلص الفستان.. وكانت خناقة كبيرة
بيني وبين عمر على الموبيل لما لقاني الساعة ١١ لسه مارجعتش
البيت رغم ان ماما كانت معايا وبابا وصلنا بالعربية الساعة ١٢
ونصف بعد ما خلص الفستان اخييبيبييرا
ورغم كده عمر كان بيتخانق بمعدل كل ربع ساعة.. ويقولّى خلاص
اللي خلص من الفستان كفاية ومش مهم الباقي وكفاية تأخير
يعنى اخده بكم أه وكم لأ ؟
يالاً اهو تغيير برضه
طب أنا ذنبي ايه فى كل الدوشة دي ؟
هو زعلان منى ليه؟

وعلشان اليوم ما يقلبش نكد أرسلت له رسالة قبل ما أروح للكوافير
قتلته: انا آسفة على تأخير امبارح.. انا نفسي أكون جميلة علشان أليق

بيك النهاردة
وطبعا اتصل بي فورا وكان فى منتهى الرقة
آه من عقل الرجالة ..

قال عمر :

رسالة سارة الجميلة امتصت كل غضبي.. فعلاً سارة ذكية جداً
وبتعرف امتى توقف المشكلة بيني وبينها
انا مش مصدق ان النهاردة ح ابقى عريس بجد!!.. أصحابي كل شوية
يكلموني و يبعثولي مسجات ملخصها كلها: بكرة تندم يا جميل
معقول الجواز يبقى خنقة وجحيم زي ما بيقلوا ؟
لا أعتقد.. لأن أنا وسارة متوافقين فى الشخصية وطريقة التفكير ..
والمشاعر كمان.. يبقى الفشل ح ييجي منين ؟
قمت توضئت وصليت ركعتين قضاء حاجة ان يوفقنا الله انا وسارة
طول العمر

قال سارة :

انا بجد خلاص ح انفجر.. من ٤ ساعات وانا عند الكوافيرة ولا أفعل
شئ.. المحل فيه ٧ عرايس غيري !!.. بجد كأننا في سيرك
الحرارة عالية جدا.. والعرايس كلهم متوترين وخايفين يتأخروا عن
ميعادهم وكلهم بيتحايلوا على الكوافيرة علشان تخلّصهم كلهم مع
بعض.. ازاي ما أعرفش

عملت لي ماسك اول ما جيت الصبح و عملت شعري رغم اني ح
أغطيه!!.. يعني باختصار لسه ما عملتش حاجة خالص والساعة ٤
وعمر حيبجي الساعة ٧

كلمني عمر وسألني: عملتي ايه؟

قلت له: ولا حاجة خالص.. وصوتي مخنوق بالبكاء
قال لي: ولا يهكم انتي قمر من غير حاجة.. طيب أكلتي حاجة ياسارة
؟

الجزء العاشر

قال عمر :

الساعة ٦ وانا عند الكوافير الرجالي.. خلاص خلّصت كل شيء..
واديتها جل على شعري والبرفان الجامد جدا وليست البدلة وكله تمام
ايه الشياكة دي يا واد يا عمر؟
صديقي ذهب يزيّن العربية وسيأتي بعد نصف ساعة كي نأخذ سارة
من الكوافير الساعة ٧ تماما
مش عاوز أتأخر عليها أحسن تزعل مني

قالت سارة :

ياستي انا ميعادي كمان ساعة ولسه ما عملتش حاجة خالص
قلتها للكوافيرة وانا أكاد أبكي.. ردت عليّ ببرود كبير معتادة عليه: لسه
٣ عرايس وبعدين انتي!! ما تقلقيش يا عروسة
يالهي.. ٣ عرايس؟! ..!!!!!!... ده انا ح أخلص الساعة ١٢ ان
شاء الله!! وصوت الموبيل لا يتوقف عن الرنين من عمر وماما الكل
بيستعجلني وكأن الذنب ذنبي.. ارتديت الفستان ومن عصيبي جزء
صغير منه انقطع من الذيل؟.. آه فعلاً هذا ما ينقصني الآن انطلقت
صديقتي تبحت في المحلات المجاورة عن ابرة وخيط بلون الفستان
كأنها تبحت عن ابرة في كوم قش.. وأخيرا جاءت وحاولنا محاولات
مستميتة ألا يظهر هذا العيب.. يارب استر يارب

قال عمر :

الساعة ٨ ونصف وانا واقف أمام مركز التجميل انا وأصدقائي وبعض
من أهل سارة
همّ بيعملوا ايه جوة بالضبط ؟
ولاحظت وجود عدة سيارات مزينة وعرسان مثلي والجميع منتظر

الفرج وكأننا فى كرنفال وكل ما تخرج عروسة من الكوافير الجميع
يجري عليها.. ثم يفوز واحد بها ويتنفس الصعداء والباقي يعودون
يجرون أذيال الخيبة !!! وسارة لا ترد على الموبيل ابداً

قالت سارة :

أخيرا حنّت على الكوافيرة وبدأت في تجهيزي والغريب اني لم
استغرق معها نصف ساعة والساعة أصبحت ٩ ونصف.. ونظرت الى
وجهي فى المراة بعد كل هذا التعب.. وجدت الفستان أنيق للغاية..
ووجهي لم أره بهذا الصفاء من قبل خلاص بقيت عروسة؟؟
يارب أعجب عمر وكل الناس.. بس عمر أهم من كل الدنيا طبعاً

قال عمر :

تسمّرت من مكاني عندما رأيت سارة تخرج من مركز التجميل..
ونسيت الانتظار الطويل والمكالمات الغاضبة من أهلي وأهلها على كل
هذا التأخير

نسيت الدنيا كلها عندما رأيتها تتألق فى فستان رائع من اللون الأزرق
الصافي المشغول برقة بخيوط فضية خلابة.. ووجهها لم أر أجمل منه
فى حياتي

وكان كل نساء الدنيا تجمعت فى امرأة واحدة
جريت عليها وهمست لها: بحبك يا سارة

حفلة الخطوبة

قالت سارة :

جالسة انا بجوار عمر وأشعر بمشاعر غريبة كلها متناقضة
فرحة وخوف وقلق وترقب

اول مرة اكون محط انظار الجميع لدرجة التحديق فى كل تفاصيل
مظهري

هو شعور جميل ولكنه يدعو للقلق.. ولكن لا يهم
المهم اني أعجبت عمر وانه سعيد بي جداً وحماني من نظرات الغضب
التي هاجمتني عتاباً لي على تأخيري
المنزل مزين بزينات واضواء رقيقة.. متى زينوه هكذا ؟
وافراد الأسرتين موجودين والجميع سعيد والزغاريد لا تتوقف ماعدا
حماتي العزيزة بالطبع
قبلتني ببرود ولامتني على تأخري ولاحظت انها طوال الوقت تهمس
فى أذن ماما بكلمات غريبة أه لا اريد ما يعكر صفوي الآن فلنقل ما
تريد

انا وعمر معا والدنيا كلها ملكنا وحدنا

قال عمر :

سارة فاتنة هذه الليلة

كم احب هذه البنت الجميلة الشقية التي دخلت حياتي فجأة بدون سابق
انذار فقلبتني رأساً على عقب.. وفى اسابيع قليلة أصبحت تملك مفاتيح
القلب وتطرق أبواب الروح وتتسلل الى أركان عقلي فتحتله كما
يتسرب الماء الصافي الى الأرض الجافة فيروبيها
أصبحت أهم انسانة لي فى هذه الدنيا
هل سنعيش معا سويا للأبد ؟

أه كم اتمنى هذا

وهل ممكن ان يتحول هذا الحب الى مشاعر الملل والرتابة فى الزواج
؟

وكيف يقرر الانسان فجأة ان يكمل حياته كلها مع انسان واحد لم يعرفه
الا منذ ايام قليلة؟

انه أمر صعب لو كان بيد الانسان

من المؤكد أن مباركة الله للزواج هى ما تيسر هذا وانه سبحانه وتعالى

هو من يؤلف بين القلوب فيجعل الغريب حبيباً

قالت سارة :

الحمد لله انى أصريت على تأجيل كتب الكتاب لفترة.. لا أتخيل ان يعقد
قراني اليوم على انسان لم اره سوى من اسابيع قليلة
صحيح انى أحببت عمر ومقتنعة به ولكن لا أستطيع حالياً تقبل فكرة
الارتباط الأبدي بهذه السرعة
الموسيقى تناسب بقوة والزغاريد تحيط بنا من كل مكان.. شعوري لا
أعرف كيف أصفه

فعلا البنات لا تكتمل وترتوي الا فى وجود رجل يحبها
حانت لحظة شرب الشربات.. يارب عمر لا يسكب على فستاني منه
كما أسمع كثيراً

الحمد لله سقاني بسلام.. حان دوري لأسقيه انا الاخرى
أخ وقعت قطرات على قميصه الناصع ورمقني بغضب شديد وصرخ
في: مش تخلي بالك يا سارة؟

قال عمر :

أخخ.. ماذا فعلت؟

الجو تكهرب فجأة من صرختى الغاضبة فى سارة والجميع صمت
ونظر لسارة التى تكاد تبكي من شدة الخجل والاحراج
لماذا تهوّرت هكذا؟ أكيد سارة ح تزعل وعندها حق
انا آسف يا سارة.. بجد آسف

سارة لا ترد عليّ وتتظاهر بالتشاغل مع صديقاتها اللاتي أدركن
الموقف وتجمعن حولها يضحكون كي يخفوا عنها الاحراج
لازم ابطل العصبية والتهور.. أصبح لي شريك فى حياتي الان قد لا
يتقبل كل تصرفاتي

خلاص يا سارة انا اسف بقى

قالت سارة :

انا آسف يا سارة !!؟ -

يا سلام بعد ما أهنتني أمام الناس؟ لماذا لم تمسك أعصابك أمام هذا

الخطأ الغير مقصود؟

هل هذا هو طبعك؟

لا يمكن ان أتحمله ولا بد أن تكون خلافتنا بيننا وحدنا لا أن يكون

الجميع طرف بها.. بجد يا عمر لن أتنازل عن هذا أبدا

قلت هذا كله لعمر وانا ارسم ابتسامة زائفة أمام الناس كي لا يلاحظوا

الخبائة الدائرة بيننا

وبادرني عمر بالاعتذار وعدم تكرار هذا.. وأخذت وقت كي أظهر

طبيعية.. وحن وقت ارتداء الشبكة وأصريت ان تلبسني اياها والدة

عمر.. من ناحية هو لم يصبح زوجي ومن ناحية أخرى انا لسه ز علانة

منه

قال عمر :

يا سلام ماما هيّ اللي ح تلبّس سارة الشبكة ؟ ايه الهنا ده ؟ يالا يبقى

القميص والشبكة

طب مين ح يلبّسني الدبلة بتاعتي؟.. البوّاب؟

ألّبست ماما سارة الطقم الذهبي ثم أوقفّتها باشارة من يدي وأخذت دبلة

سارة واقتربت منها ورجوتها وهمست لها: علشان خاطري يا سارة انا

نفسي أظل أتذكر هذه اللحظة وانا أضع اسمي حول أصبعك للأبد..

أرجوكي علشان خاطري.. لن ألمس يدك أساساً.. ألف مبروك يا

حبيبتي

قالت سارة :

حبيبتي؟

اول مرة أسمعها منك يا عمر

....والله انت اللي

الله الدبلة شكلها جميل جدا فى اصبعي.. أجمل من ايّ خاتم امتلكته فى
حياتي.. وكفاية ان عليها اسم عمر كي تكون أغلى دبلة فى الوجود
ألبسته بدوري دبلة المحفور عليها اسمي ونحن نطير سوياً فى دنيا
خاصة بنا.. ونسمع موسيقى تعزفها قلوبنا ونخطو خطواتنا الاولى نحو
دنيانا الجديدة

دنيا محفور على بابها.. اسمينا فقط

سارة وعمر

الجزء الحادي عشر (قبل الأخير)

قالت سارة :

استقرت حياتي انا وعمر بعد الخطوبة الرسمية وشعرنا سويا باستقرار نفسي كبير

أصبح لكل منا شريك يستريح على شاطئه ويلقي على كتفه همومه..
أصبحت لا أخجل من وجود رجل في حياتي.. أكلمه على الملأ أمام أبي وأخوتي وأتحدث عن آراءه وأفكاره وأستشهد بها بدون خجل وهل يخجل المحامى عندما يستشهد بمواد القانون؟.. وان كان الأمر لا يخلو من المشاحنات والخلافات البسيطة التي تزداد بعصبية عمر التي تشتعل سريعا وتخبو سريعا ولكني أخاف كثيرا من هذه العصبية والتسرع فى رد الفعل الخاطيء له فى أحيان كثيرة.. ومما يزيد عصبية عنادى الطفولى الذى هو من أبرز عيوبى للأسف

قال عمر :

شعور جميل ان يكون لك صديق وحبيب في حياتك تتبادل معه الأخبار والأوجاع والضحكات

أشعر أنني قبل معرفتي بسارة لم أكن موجودا فى هذه الحياة أشعر معها وكأنني طفل صغير يعود سريعا فى نهاية يومه ليقص على أمه كل ما حدث له فى يومه.. أحب ردودها التلقائية وضحكاتها البريئة وخوفها الطفولى عندما يرتفع صوتي فى عصبية ولا أطيق غضبها مني وأبادر دوما بمصالحتها
كم أحب وجودك معي يا سارة

قالت سارة :

لاحظت أن أكثر أوقات خلافنا أنا وعمر هي عند عودتي من عملي في الرابعة.. ولو اتصل بي ووجدني نائمة أو رددت عليه في تعب يختلق أي مشكلة تافهة ويغضب عليها

هل يغار عمر من عملي ؟ أم من انشغالي عنه لمدة ساعات في اليوم ؟؟
رغم اني أحادثه من عملي تليفونيا وأصلاً عملي من الثامنة حتى الرابعة زي ناس كثيرين جدا

أمال لو كنت طبيبة وأبات في المستشفى كان عمل ايه؟.. أكيد كان انتحر

راودتني شكوك حول الموضوع ده واشتكيت لأمي فقالت لي: طبيعة الرجل دوماً أنانية لا يريد أن يشغلك عنه أحد آخر حتى لو كان عمك ونجاحك.. استحملي يا بنتي ولا تفتحي معه هذا الموضوع حتى يفتحه هو

ولم أنتظر طويلاً حتى جاء يوم وكلمني في التليفون بعد عملي كالمعتاد وكنت ح أموت وأنام ساعة فكنت أرد عليه سريعاً فلاحظ ذلك وقال لي مباشرة : سارة انتى الشغل ده مهم عندك أوي ؟

قلت: يعني ايه مهم يا عمر؟.. هوّ يعني فستان أخده ولا اسيبه؟.. ده شغلي ونجاحي.. وبعدين قصدك ايه؟

رد عليّ بحدّة: قصدى انك ياريت تسيبيه بعد الزواج وياريت من دلوقتى

رددت عليه بذهول: بتقول ايه يا عمر ليه ده كله؟ هوّ شغلي مضايقتك في ايه بس؟

قال عمر: أنا ما أحبش مراتى تشتغل وترجع البيت الساعة خمسة وتنبهدل في المواصلات.. علشان ايه ده كله ؟

قلت له في صوت عال بعض الشيء: طيب ما قلتش ده ليه قبل الخطوبة ؟ واتقدمت ليّ ليه أصلاً وانت عارف انى باشتغل ؟

فوجىء عمر من رد فعلي الهجومى وكأنه كان يتوقع الطاعة المطلقة:

يعني لو كنت قلت لك ده قبل الخطوبة كنتي ما وافقتيش عليّ ؟
رددت بعناد وبتسرع: طبعا

صمت عمر وتألّم من ردي القاسي ولم يرد
حاولت تهدئة الجو قبل أن تثور ثائرتة وقلت له: يا عمر من فضلك
افهمني.. ليه دايمًا الرجل اول ما يشوف بنت وتعجبه يعجبه نشاطها
ونجاحها فى العمل وطموحها وثقاقتها ويتقرب لها من الجانب ده.. ولمّا
خلاص تصبح ملكه يسعى جاهدا ان يجعلها صورة من جدته لا تخرج
ولا تعمل ولا تبدي اى آراء الا من خلاله؟.. ثم بعد هذا يشتكى من
تغيرها بعد الزواج

رد عمر: أنا مش عاوز أخليكي زي جدتي ولا حاجة.. أنا بس مش
عاوزك تشتغلي.. فيها حاجة دي؟

فقلت أنا: كان مفروض تكون صريح معايا اول ما اتقابلنا وتقول لي
الكلام ده وانا اللي اقرر حياتي ح تكون ازاي معاك واما اوافق او
ارفض.. لكن انت كده بتضعني امام الأمر الواقع
رد بعصبية كبيرة: يعنى انا خدعتك يا سارة؟.. قصدك كده؟
حاولت تهدئته فقلت له: يا سيدي ولا خدعتي ولا حاجة.. طب انت ايه
اللى مضايقتك من شغلي؟

قال: تقدري تقوليلى لما نتجوّز ح تراعى البيت ازاي وانتي بترجعي
المغرب.. ولما نخلف ح تسيبي البيبي فين الوقت ده كله؟
رددت عليه: هوّ أنا اول انسانة فى الكون بتشتغل؟.. اكيد كل دي حياة
ملايين السيدات مش انا بس؟

قال بضيق: أهو انا باتضايق من عنادك ده يا سارة
استفزتني الكلمة فقلت: ده مش عند.. ده حق ليّ اني اكون ناجحة..
المفروض وجودنا فى حياة بعض يخلينا احنا الاتنين ناجحين مش واحد
ينجح والتاني يكون مجرد ظل باهت للآخر وخلص
قال بعصبية: يعنى انتى مش عاوزة تسمعي كلامي؟
رددت بعناد كبير: اسمع كلامك لما يكون فيه منطق.. لكن لما يكون
تحكّم وخلص وفرض رأي انا آسفة.. مش ح اقدر أسيب شغلى بدون

مبررات كافية

قال: ده اخر كلام عندك ؟

أحسست ان كلمته دي بداية مشكلة كبيرة ومع ذلك رددت بعناد كبير:
ايوة

وانتهت المناقشة بقوله: خلاص انتي اللي اخترتي يا سارة

بعد أيام

قالت سارة :

أول مرة نتخاصم انا وعمر من يوم ما اتخطبنا.. اتخانقنا كثير لكن كنا
بنتصالح سريعاً.. والحق يقال كان هو دائماً من يبادر بصلحي حتى لو
كنت انا المخطئة

احساس البعد سيء جداً.. شعرت ان ايام الخصام القصيرة مرت كأنها
شهور طويلة

لم يحدثني في التليفون ولم يرسل لي رسالة ولا حتى رنة من
الموبايل.. وأنا كرامتي منعتني أن أبدأ أنا بالحديث
لماذا يضغط عليّ بهذا الأسلوب كي يرغمني على التنازل عن
مستقبلي.. وهل هذا آخر تنازل أم ان سلسلة التنازلات لن تنتهي؟
انا لا أعرف وجه تصميمه على تركي العمل.. وهل وانا تعديت
الخامسة والعشرين أخذ مصروفي من ابي مثل الاطفال؟.. ومتى انضج
واتعلم الاستقلالية اذن؟.. في سن الستين؟
يبدو ان الرجل يريد من زوجته ان تكون تابعاً له بلا اي شخصية
كده يا عمر هنت عليك؟

قال عمر :

كده يا سارة هنت عليكي ؟

لم تفكر ان تتصل بي ولا مرة حتى ولو من باب الاطمئنان عليّ
انا الذي عودتها على هذا الاسلوب.. في كل مرة نختلف ابادر انا
بمصالحتها حتى لو كانت هي المخطئة.. انا بجد دلعتها كثير وممكن

تظن انها متحكمة فيّ بهذا الأسلوب او ان شخصيتي ضعيفة
لا انا مش ح اسأل عليها المرة دي مع اني ح اتجنن وأسمع صوتها..
بس هي لازم تسمع كلامي وتطيعني بلا نقاش!!.. وبرضه مش ح
اتصل

قالت سارة :

درجة حرارتي ارتفعت من الانفلونزا واشعر بصداع رهيب ألزمني
الفراش

يببدو ان هذا مرض نفسي زي ما بيقولوا.. ووجدتها حجة مقنعة كي

ابكي براحتي واتحجج بالصداع

لاحظت امي ان عمر لا يتصل ولا يأتي منذ أسبوع فسألتني عن السبب
فتحججت بحجج واهية

فقلت لي: أسألي عنه انتي يا سارة.. الراجل بيحب دائما ان يشعر

باهتمام كبير مثل الطفل تماما.. فرفضت بشدة.. ففهمت ان هناك مشكلة
ولم تلح عليّ في معرفة الأسباب.. وخرجت من غرفتي وتركتني انام

وبعد قليل سمعت صوتها يتحدث في التليفون مع حماتي العزيزة

وتجتهد ان تجعل الحديث عادياً جداً وختمته بخبر هام جدا من أجله كان
كل هذا الاتصال وهو: ان سارة عيانة جدا جدا.. ونايمة ياعيني في

السريير درجة حرارتها ٦٠

تابعت الحديث وابتسمت من حنية امي ورقنتها

تريد أن تصالحنا انا وعمر بدون ان تتدخل او تتدخل

يا حبيبتي يا ماما

بس لو عمر ما اتصلش برضه بعد ما يعرف اني تعبانة.. يبقى

.....

معقول؟!.. معقول يا عمر؟

قال عمر :

سارة تعبانة؟!.. يا حبيبتي يا سارة؟

علشان كده ما اتصلتش بيّ وانا ظلمتها
لازم اروح لها حالياً.. أهو المرض جه حجة كويسة علشان اروح بسبب
مقنع اصلي خلاص بجد مش قادر على البعد والخصام الرهيب ده

قالت سارة :

كده يا عمر ولا حتى رسالة؟ -

قلتها لنفسى وانا لا أنزل عيني من على الموبيل وكأنني اخاف لو
ابعدت عيني عنه لن اسمعه لو رن
منتظرة اتصال عمر الذى لا يأتي.. يبدو انه فعلاً قاسي ويرغمني بكل
الطرق ان اتنازل عن كل شىء حتى يضغط عليّ وانا مريضة
لا يمكن أكلمه بعد اليوم.. ولا اعتقد اني سأكمل الخطوبة اصلاً.. بجد
مش عاوزاه و

....

صوت ماما يرن في أذني: عمر جه يا سارة

الجزء الثاني عشر والأخير

قال عمر :

نسيتُ كل خلافي مع سارة وزعلي منها عندما رأيتها وهي متعبة
محمرة العينين مرهقة كأنها لم تنم من سنين.. وهتفت بها في قلق كبير
اول ما رأيتها: الف سلامة عليكى.. ان شا الله انا وانتى لأ

ردت عليّ: بعد الشر عنك يا عمر انا الحمد لله بخير
همستُ بالكلمات فى صوت خفيض: اول ما عرفت انك تعبانة جيت
جري.. خلي بالك من نفسك يا سارة انتى دلوقتي مش بتاعتك لوحدك..
لا بتاعتى انا كمان

سارة:!؟

أنا: انتى زعلانة مني ؟

سارة:!؟

أنا: خلاص بقى حقك عليّ.. انا فعلا اخدت الموضوع بعصبية شوية
بس انا خايف عليكى مش اكثر

سارة: كان ممكن نتناقش فى الموضوع بهدوء ومن غير ما حد يفرض
سيطرته ولا يحاول يلغي شخصية الطرف الثاني

أنا: طيب لو قلت لك علشان خاطري فكري في موضوع الشغل ده
تاني.. تقولي ايه ؟

سارة: أقول خاطرك غالي عليّ جدا.. واني بالاسلوب ده فعلا ممكن

أفكر فى حل وسط.. مثلا اني بعد الزواج ادور على شغل مواعيده
بدري عن كده.. في حضانه مثلاً.. علشان البيت والبيبي.. موافق ؟

أنا: موافق جدا.. و ح نسويه ايه ؟

سارة: مين ؟

أنا: البيبي؟

سارة:!؟

ربنا يستر ونلاقى شقة ايجارها معقول وتكون مناسبة
الحمد لله ان سارة ما وافقتش على ترك الشغل كان زماننا كل اول شهر
واقفين على باب الحسين او السيدة
طبعا مفهوم بنعمل ايه

قالت سارة :

ايه لزوم ان الواحد يجيب من كل حاجة نسختين.. واحد للاستعمال
والتانية منظره ؟

يعنى طقم صيني للاستعمال وسرفيس ماركة غالية جداً يبقى محنط فى
النيش؟!.. ومعالق للاستعمال وأخرى فى حقيبة دبلوماسية براقه
سعرها فلكى.. هددتني امي لو لمستها ستبلغ عني البوليس
وأغلب الظن ان الحاجات دى سأستعملها لما خطيب بنتي كمان ٣٠
سنة بييجي يزورنا!!!.. ده غير الف طقم مثل طقم للشربات وطقم
للتورته واخر للكاكاو واخر للايس كريم واخر للخشاف.. مش عارفة
خشاف ايه ده ؟

مش ممكن المنظره دى كلها.. ويقولوا البنات بيعنّسوا ليه ؟
أكيد من قائمة المتفجرات التى تنفجر فى وجة اي اثنين بيفكروا مجرد
تفكير فى الارتباط الحلال.. رغم ان امي أخبرتني انها فى زواجها
كانت لا تملك اياً من الاجهزة الكهربائيه غير البوتجاز ومن عملها هي
وابي احضروا الغسالة العاديه ثم الثلاجة ولم يفكروا فى التليفزيون الا
بعد سنين رغم انها هما الاثنتين من عائلات محترمة ولكن كانت
النظره للزواج عملية و بسيطة ولا وجة للمقارنات الفارغة بين اي بيت
والاخر

وانا رأيي عندما يبني الاثنين عشهما سيكون من المستحيل ان يفرّطوا
فيه ابدأ.. لكن الان نرى حالات طلاق بعد شهور لأن العروسين وجدوا
منزلاً جاهز من كل شىء حتى التكيف والدش ولم يتعبوا فيه لحظة
فلماذا يتحملوا كى يظل هذا المنزل قائماً؟؟

والعملية والبساطة.. والمجلة الحديثة تتحدث عن الفورفورجيه في
غرفة النوم وكيفية تلميع الباركية ومزايا التكييف السبليت عن الشباك
في منزل العروسين
يبدو انهم يتحدثون عن عرائس من القمر وعرسان من المريخ

يوم الزفاف

وأخيراً جاء اليوم المنتظر
اليوم الذى تتوقف فيه عقارب الساعة وتبدأ دورة جديدة غامضة
اليوم الذى تصمت فيه الكلمات وتتحدث القلوب وتتوحد
اليوم الذى يشهد فيه الله وهو خير شاهداً على ارتباط شابين رباطاً وثيقاً
وميثاقاً غليظاً كما أسماه القرآن
يوم الزفاف

كل ما كان محرماً يصبح حلالاً بكلمة الله
كل ما كان مجهولاً غامضاً يصبح سهلاً المنال
يوم تتغير وجوه الأحبة ونفارق وجوهاً عاشرناها سنوات طوال
ونعشق وجوهاً أخرى ونسكن منازل جديدة غامضة لا نعرف ماذا
ينتظرنا بها السعادة ام الشقاء
الفتاة التى طالما خجلت من وجود أخيها او ابوها معها فى منزلها تصبح
زوجة وانثى مكتملة الانوثة لها رجل لا تخجل معه من شيء
تشاركه أفراحه
وأحزانه
وكلماته
وغضبه
وحنانه
ومشاعره
وتهدده كطفلها البكر وتربت على كتفه اذا غضب ويلقي على صدرها

كل همومه واسراره

ومع هذه الاسرار والاحلام ينمو البيت الصغير وتكبر جدرانه وتمتد

جذوره فى ارض الواقع

ليصبح هذا البيت القلعة الحصينة التى يرفض الزوجان المساس بها من

أى غريب.. ويصبح البيت الجديد احب مكان على الارض يأوي

الحبيبين

أفكار كثيرة تدور اليوم فى عقل العروسين سارة وعمر بلا تفرقة اليوم

لأنهما اصبحا كياناً واحداً

سارة جالسة تضيء جمالاً بفستانها الابيض الملائكي الذى يحمل كل

اسرار العذارى وغموض الانثى ودلالها

وعمر المكتمل الأناقة فى بدلته السوداء والذي يشعر باكتمال رجولته

لأنه اخيراً سيكتمل وجوده فى هذا العالم باقترانه بنصف روحه وانثى

حياته سارة

وقلوب الجميع خاشعة من فرط السعادة والدعاء لله ان يكمل هذا

الارتباط ببركته ورضاه سبحانه وتعالى

واذان الجميع متعلقة بشفاة المأذون الذى يتلو آيات المودة والرحمة

ويقول خطبة الزواج ويتوقف عند آية: واخذنا منكم ميثاقاً غليظاً..

ليوصي بها عمر ان الرجل يأخذ زوجته أميرة من منزل أهلها ويعقد

معهم ميثاقاً غليظاً بألا يجعلها أسيرة فى منزله.. فلا ينسى هذا العهد

ابداً ويوصيه بأخلاق الرسول مع زوجاته

ثم يوصي سارة ان تجعل زوجها قرّة عينها ووطنها الذي لا ترضى

عنه بديلاً

وتلمع العيون سعادة وخشوعاً عندما يعلن المأذون انهما الآن زوجين

امام الله وامام العالم

وتبكي سارة فيقترب منها عمر ويلمس يدها لأول مرّة ويقبلها ويوعدها
الأّ تبكي ابدأ مادام هو حياً على هذه الارض
فتبتسم وترتعش من لمسة يد زوجها الحبيب وتقول: فلنعقد الآن قراننا
بنفسنا.. وتهمس له: زوجتك نفسي على سنة الله ورسوله وعلى مذهب
الامام ابي حنيفة النعمان وعلى الصداق المسمّى بيننا
فيهمس لها: وأنا قبلت زواجك يا زوجتي وحببتي وسكني وداري
وجنتي... وقرّة قلبي

تمت بحمد الله
